

吳學士文集

吳學士文集卷三

番禺梁肇煌檀圃編訂  
全椒辭時雨慰農編訂

團扇賦

莎庭露淺槐院雨遲曉涼初退午炎漸滋竹虛心而拒暑葵衛  
足而迎曦客已謝夫襍穢人未接夫黃羲井華先潔冰梓次陳  
花眠紅而倦舞柏列翠而無聲池波自定茶煙不生客御南薰  
童進團扇翼薄秋蟬體輕春燕近篤耨而香裊拂芙蓉而豔顛  
扇無定式良工製精揉蒼筤而形具削紫瓊而柄成穀衣分素  
紗標較明曾未截夫鶴羽已足拒夫蠅營窈窕深閨婀娜淑姿  
纖手冰握皓腕雪持納涼獨倚消夏相期浮瓜去蔓劈藕憐絲  
增璧影於解佩濛璇源於臨池妝成不掩鏡舞罷還中規其質

清新可以辟塵其形團圓可以合歡惟君子之提撕懷清風而  
贈貽其明月而皎潔詎蕭辰而別離

後團扇賦

客見予舊作團扇賦哂之曰子之賦俛色揣稱之法得矣於因物諷諭之旨缺如也卒章戒秋風之棄古人已言之且不必團扇也乃更賦曰

團團明月高不可掇好風何來明月入懷匪縱魚於璧沼詎棲鳳於鏡臺忽圓影之晃朗已清光之徘徊暑雨易晴熱雲四生飢座無梨煩襟不清乃臨深池請返淑颺微颺不來白日隨之搖清卻燠惟扇之宜伊扇之製取材無方鸛鶴之羽旣富蒲葵之材並良或剡藤以作質或齊紈以爲章其材卽剛柔咸宜其用亦規矩並中疑四楞之亦佳奚重規之獨用君子曰無定者物之形式有主者我之行藏苟外圓而內方將人熱而我涼

並蒂蓮賦

蘇齋先生示肅此圖屬爲駢體文一首儷筌前輩已有四六敘不敢更做此體乃賦之曰

偉元澤之胎美兮育瑞物於平泉絜斯花之獨靈兮抒麗藻於

自然

曹植芙蓉賦覽百卉之英茂無斯華之獨靈孫楚蓮花賦有自然之靈草

在宋元嘉生於建康

兮曾莖子而萼駢光經生之門業兮茲復兆夫良緣惟康成之傳學兮草紛披夫書帶僦茅舍於山峪兮屋雖小而道大儼叔黨之從子瞻兮創荆榛而手艾孰載酒而問奇兮得同術於比隣溯仙李之盤根兮衍韡鄂於後昆作門牆之桃李兮又申之以婚姻筭協吉於歸妹兮冰未泮而筮辰烹祠竈之黃羊兮遂速舅而娛賓兒與婦其並佳兮照膝前之雙璧賦催妝而卻扇

今試畫眉之彩筆客誦偕老於百年兮機已後於嘉植婦斂衽  
而前嗽兮憶初秋之嘉朕酌金尊以賞勝兮見紅葩之舒錦中  
一莖之標異兮洵五沃之靈稟兆同心與其命兮羌胚胎之可  
審瞻名繪於壁上兮更異理而合符先生舊有憚冰並蒂蓮圖唯盆中與圖  
中兮均擢秀而飲腴一浥雨而染絳一研露而施朱惟化工與  
畫工若同工而寫照出綠波而蘊聯張素壁而麤抱命丹青以  
紀事美奇徵而其道長者繫之以說兮爰敦行而勛德花合歡  
而木連理兮珊瑚交柯而玉茁謝吉語之相因兮紛鋪張於前  
冊將觀培蒔於英髦兮彰本根於先澤務積謙而持久兮兩家  
相勉以不忒庶揚芳而舉實兮薦神明而光邦國小子誦之而  
再拜兮味斯言之獨良唯碩儒之含醇兮能飲和而召祥辭大

美而弗尸兮期後起之衍慶大化俶於闈房兮配兩儀而道臧  
眎此君子之花兮鼓氣機而吐芳卻飛塵而脫淤泥兮毓靈實  
於細房繼美而增淑兮葆初服於荷裳請賡苞茂於異日兮吾  
再登六桂之堂

擬王元長三月三日曲水詩序

臣考濬川刻石禹跡踰於九州登岱燔柴虞廷畫以五載若其  
澤施自近飛觴泛於上都慶行以時行幄降於元巳方冊所陳  
昉自周之盛也降而勞功數實晉讌華林之園殷外煥內宋禊  
樂遊之苑論功校德渺乎其小焉矣天胙大齊篤生明聖我太  
祖高皇帝神表挺異瑞圖兆期秉鉞事殷錫圭啟夏洗氛靖宇  
拯溺登席位甫攝而苗遷步未改而粟發迨乎璧沈洛水鼎入  
周京西土之顧旣殷南河之避不果受終神斗駟德彤車正位  
應五三之精卜世宏億萬之算業爲可繼嗣實允師然而建旌  
吉月之陽第頌屬玉之館所以迎和而招慶底定之始固謙讓  
而未遑也今天子體元履德繼序加勞成不敢康武其善述奠



神器以虔鞏承寶歷以尊肅年則屢豐日如不滿琢磋聖質育  
覈仁林神作閒館之賓帝答宣室之問於是權衡文質媵琬剛  
柔解燒寬五宅之刑章儀備三宮之典用能治臻上理光被外  
區益井福於江河升玉章於雲漢皇儲養晦前星增潤後海雞  
人知其孝子虎闔齒於經師豫仁育於東朝觀樂成於太學猶  
且降春坊而問道開夏屋而延英文章準六籍之言賓客求三  
公之選天子方推心肺腑布蔭本根一枝依若木之溫半圭錫  
其桐之信天施之屬福祉繁焉朝廷之上官以人備鷹揚昧爽  
之會麟遊平成之朝伊呂與定策之勳旦奭兼採風之使並皆  
德具三材智益四海灌輸六府呼吸二氣元黃袞職闔闢辰樞  
言爲膏流措如磐固夫其謨烈之緒相承親賢之道兼尙是故

歸皇極於正直播王府之和鈞中外從以風翔朔南會於日至  
天行不忒登臺但察其祥君舉無愆簪筆得伸其信春朝養老  
鳩集於堂上秋夕試功鷺振於階下耆碩扶杖而觀化俊髦彈  
冠而乘時去幽卽明出谷遷木育德之地里塾比於膠庠薦賢  
之司政府勤於令長天子又命使者行邦國詔諸侯王舉所知  
安車四出元纁再徵維易逝之駒心用未漸之鴻羽一時晞髮  
蹈海之士驥首銘山之材博通經術之儒能使絕國之彥連襪  
振袂並集闕下天子論材辨等稱事畀官薇罷采於西山黍告  
豐於南國小人草偃大旱苗蘇反側自安奸宄並息羊朝渴於  
後市犬夜瘖於下邑八紘同其俗四民世其業中國有聖外表  
無塵弓雖勁而在冰馬多良而不汗東踰日出西盡河源比肩

迭望之民饑頰爲飾之國未損一矢罔血隻戈吹呂辨雲請子  
侍日鑿齒廷尊耳費玉駝陳珍羽集蠶宜霜布利火禱長溫城  
不夜煌煌扈扈鱗鱗翼翼眾形殊聲世莫得而辨識海夷不遠  
列於明堂之位天馬且來播於太常之樂所謂荷天之寵小球  
大共四國來同萬福攸同者哉諸侯之歡心合一人之明德馨  
榮光旁溢嘉貺畢臻祥芝九莖瑞麥雙穎白烏三獲朱雁一歌  
寶鼎薦於神居甘露入於御饌握靈草而夏肅慨甘泉而冬榮  
其雨以嘉曰暘時若瀆効職於萬年嶽朝王於一豫然後紀功  
石室之壇刊名銀繩之印增高日觀益崇雲亭纂嘉號於七十  
有二家至於斯盛乃念陰謝陽施春涉寒往繁羽變音於崇林  
織鱗險波於芳沼品彙向榮眾庶迓福思以行和宣勞錫祉施

惠聞雞圖政之暇取鮪薦新之初總百辟而延釐萃羣工而飲  
酌爰擇元辰遂臨行所禮也則有芳林園者咸池浴日之波華  
渚流星之地發其祥而茶甘過者化而畊讓昔龍潛而雲靄今  
魚在而藻交天維地絡動止植生原陞度於邠公臺沼營於姬  
伯擴舊基而布繡啟大宇而增暉萃金石以崢嶸疲輸倕以雕  
飾架飛梁而虹飲抗行殿而飈迴珠引媚於圓流璧割明於方  
沼波乍生而雨霏泉甫渟而月滿降牽牛於鏡渚下翔鳳於華  
桐都丹谷而迎曦屆青陽而留煦氣動吹葭光餘轉蕙萃既長  
而鹿肥桑並垂而鳩醉離宮斯在掌帟預縣山祇蹕於前期水  
若警於先路禮展樂具法駕晨興塵既淨而鷺閒林未曙而鯨  
震曳飛髻而星啟揭太常而烏飛振轡霞流揚髮霧台部分山

立蹕止淵渟觀來牟於王畿省函活於御藉快百穫而占十稔  
喜可知也迨乎羽爵流馨鮮庖薦旨躡江騰漢採甘調辛圖案  
方丈臨於曲水波照影於佩魚泉答響於鳴玉樂占六爻之豫  
詩徵二雅之材君歌鹿鳴臣賡皋拜按洞庭之古節續大漠之  
遺音八風不奸萬舞有奔神祇感於合變華裔同其太和弱化  
柔移孚出萌達斯其宣上通下郭物息民非徒愷悌流於近畿  
燕樂被乎侍從已也德澤生其光輝小大飽乎仁義報以介福  
綏我眉壽樂既間而將終酒無算而有節禮成且退有詔賦詩  
臣爲之序舉實陳信以示萬年時則今天子卽位之九年歲在  
辛未三月三日也

八家四六文鈔序

國家化成萬禩道光八野人握珠璧文奮鸞龍其以立言垂不朽者不僅數公茲就蕭師友之間鑽仰所逮或親炙言論或私淑諸人所知在此也卽蕭卅年遊學江湖受知場屋鉅公名德辱收之者亦不僅數公眾製分門元音異器茲集局於四六一體道則共貫藝有獨工所錄在此也此數公者通儒上材或修述樸學傳薪賈鄭或鳴于樂府嗣響雅騷傳世行遠不名一技茲集發於生徒之請綜爲駢儷之則採片石於抵鵲之山挂隻鱗於游龍之淵所業在此也夫一奇一偶數相生而相成尙質尙文道日衍而日盛暘谷幽都之名古史工於屬對觀閔受侮之句葩經已有儷言道其緣起略見源流蓋琴無取乎偏絃之

張錦非倚乎獨繭之剝以多爲貴雙詞非駢拇也沿飾得奇偶語非重臺也要其擣摻雖富不害性靈開闔自如善養吾氣敷陳士行蔚宗以論史鈎抉文心彥和以談藝而必左袒秦漢右居韓歐排齊梁爲江河之下指王楊爲刀圭之誤不其過與然而醇甘所以養生或曰腐腸之藥笙簧所以悅聽或曰亂雅之音是故言不居要則藻豐而傷煩文不師古則思驚而近謬鉛黛飾容夫豈盼倩之質旌旗列仗乃非節制之師雖復硬語橫空巧思合綺好馳驟而前規亡貪掎摭而眞精失其有擺脫凡近規撫初祖眞宰不存形似取具屋下架屋歧途又歧又其下者翦裁經文而邊幅益儉揣摩時好而氣息愈囂啟事則吏曹公言數典則俳優小說其不得仰配於古文詞宜矣薰得友多

聞恭承大雅伐柯之則不遠吹律之祕可覩規之前賢則異代  
接武準之選理則殊塗同歸用是合爲一編質諸百代枚馬並  
世而遲速不同卜顓一師而與拒相左諸君語羞雷同出則轍  
合所以貴也至於撰錄矜慎服膺有年抄撮寡約染指可飽今  
之所集多少不均良以方朔萬言阮咸三語酌理以爲富愜心  
不尙奢各有當焉名山之托僕非其人觀者諒之靡苛以例可  
耳



維清堂詩序

座師長白宮保公維清堂編年詩座師中丞儀徵阮公刻之山左在嘉慶丙辰丁巳閒凡幾十有幾卷海內偉抱樸學之士既仰北斗復御南車思王之作言成一家昌黎之碑誦者萬遍厥製偉矣羣尙翕然而公冲懷不盈進取無倦資之深造悔其少作覆加刊定蓋存者十之五六焉蓋以戊午以後之詩易編年爲分體乙丑春河帥徐公心如刻之濟南凡幾十有幾卷公郵示其門下士全椒吳肅讀之而命之叙維公之詩問津雅材探源樂府本乎性情發之歌詠初刻叙之詳矣近年來與令弟少宰公阮舍雖分姜被仍共或分香華陞或聽雨先廬離合不渝悲歡無閒如形在而影隨如指傷而心痛迨乎謝草之夢竟遙

孔黎之歡永罷憶聯床之樂對客失聲聞斷雁之鳴登高罷會  
撫猶子於孤露礪率祖以清風婚冠之禮早成師友之遊必擇  
本一心之精白受兩朝之知遇士林倚其中立

聖人知其無黨不援勢以求進不徇眾以固榮述清第之世範  
懼慚卿長道昔賢之素尙足式廉懦暨乎九棘列位八州作督  
不濁之水出山能潤直上之雲觸石爲霖且公弱冠登朝盛年  
秉節樹人之慶內外八座奠川之績拱揖三公撰鄉人之集至  
尊賜名購大賢之書遠裔得寶而乃位尊心下地腴身瘠懸眉  
有戒防意維嚴公於節署懸禮義廉恥四字於廳事又於座右  
臥處大書驕奢淫佚四字細書其弊以自警故  
能因心揆藻履道成章七音中度而無繁聲五文煥彩而無閒  
色讀者生其禮讓之心篤其君親之愛詩非小道於茲信矣他

日功德益崇津梁未倦稷契許身大川克濟文章華國名山允  
藏肅門下士又部人也叙會昌一品之集賦中和率職之詩善  
言德行或進於是

桐城張氏經筵四世詩序

代

講筵四世詩鈔十卷桐城張文端公與子少詹事隨齋公太保文和公少宗伯藥齋公少司空思齋公暨孫檢討魚牀先生侍講中峻先生閣學晴嵐鏡壑兩先生曾孫少詹事樞庭先生之作也公父子入相一門鼎貴人各有集茲冊之編標銜彙次尊經筵之鉅典尙講幄之渥恩以示子孫光紀載可謂盛哉其曾孫宿州司訓曾虔示余讀之且請爲序夫冠蓋清第詩人資以立言令僕世系史家爲之作表然而組織七葉惟恃門蔭河岱萬年皆由勳舊公則王顥聚書范喬留硯貽謀之臧並舉詞科稽古之榮壘升講席極雕龍之世禪資藻卷之日新此其隆遇一也韋平之貴經術可以致君異同之辨殿中尊其專席乃或

擁比北面喬梓末世其官授易東宮弓冶僅濟其美君子之澤  
易盡專門之學亦衰公一經相授四傳未艾車馬拜賜實兼三  
朝春秋起家遂光累葉溫室之樹家公不言華光之講曾孫克  
敵此其隆遇又一也若夫法言之進無球冲怠邇英之辭恐虛  
啟沃臣恃舊學之親君厭苦口之數省覽未賜寵賁已終公一  
門四世之榮實千載一時之盛值堯舜宣執中之傳於十六字  
儼伊呂應見知之運於五百年

御論首發得聞要道抑戒既奏同遊太和每因一日之接遂折  
六藝之衷經幄較親綸扉特晉或存歷槐棘或出司喉舌几杖  
錫於莫年榮戟光於後嗣並因侍講益利用賓終始一心生成  
再造此其隆遇又一也至於有韻之文莫先於經其音之矢並

列於雅揚馬倡進御之篇賦頌鮮傳信之語侈陳祥瑞乃紀黃龍虛誇戰功僅來天馬爲之君者不能六五帝四三王爲之臣者雖有述作其義不實其言慙不足以傳世而行遠也讀公家集翼我國史慶

列聖之相承快萬里之日闢武成之頌非侈開邊文華之侍並詳典學遭逢旣盛典冊遂多虞廷元首之颺周詩單心之句被於樂府編爲實錄此其隆遇又一也珪不及見文端公而於侍講閣學少詹先後同直館閣子瞻悼逝未見范公昌黎殉知宜銘馬監遊君子之鄉典型不遠識大賢之後編輯方勤用敢先以韋乘非僅光於旂常云爾

題襟館銷寒聯句詩後序

若夫空桑枯竹異產而合響騫腹厚唇異聲而竝設良以千里  
萬里各儲樂府之材大鳴小鳴皆佐音均之妙譬諸沮漳之水  
滙流以交輝元黃之色相次以成章也審音若此立言亦然獨  
寐之歌一士自悅其考槃友聲之求詩人必從于伐木是則專  
瑟難聽奚取子絃高曲寡和圍無同調惟聯句者其能發金石  
於眾口合宮商之百變者乎昔子政以中路爲二人之作彥和  
以柏梁爲其韻之初權輿所屬略可名言齊梁以來實繁作者  
清暑之殿亦倣夫漢皇鳴雁之篇蓋倡于陶令謝宣城何記室  
庾度支三家集中較多鄱陽註昌黎之詩元胎皋禹少陵送字  
又之作萌芽孟韓雪浪齋日記乃謂退之創闢古無此法陋矣

夫彙集之編萃百代爲一帙襍擬之作肖眾製于隻手鑪錘同  
範源流其貫乖反無譏于隱侯蓋各猶許于梁帝况于羣賢並  
世異曲協奏執圭執幣泗上婚姻之國修矛修戟江東子弟之  
師儀九成之球石鳳德有鄰樂三爵之笙簧鹿羣偕食迭唱之  
妙不異壘篴心聲之同若合符節義悉準乎詩譜大小之雅遞  
歌詞不限于方言晉楚之材互借不其盛哉然而蕭祖傾城之  
句秘書聽雅之章並云擬古曾非居今大抵相如之賦不必同  
時大理之玉曠年未遇競病強韻靡續于後來別離祖席罕萃  
夫文士則將望而遙集斷而弗續已耳南城曾公轉運邗上清  
望旣符齏政以理簿書克勤嘯歌無廢賓客之盛不減聚星之  
堂湖海之士竝有登龍之願公博採羣雅兼綜專門仲宣之少



已賞于中郎賈島之瘦罔棄于吏部于是遠慕謝尚書張使君  
之會近仿朱檢討查編修之體爲聯句詩若干首雕鏤山水畫  
繪蟲魚論詩論史之識知古知今之才聽斷之暇並用五官蒼  
萃之奇如出一手肅以下走得辱後車每自病于蜂腰輒幸附  
平驥尾夫善歌者繼聲若喁于拙附者共音如秦越三年之琴  
情未移于師七賢之游趣不同于友諸君標尙超越志行完粹  
故能造車合轍吹琯應律一篇之中無所忤焉然而師曠司樂  
則羣工鮮不諧之節荀勗典音則太古有不墜之旨今之作者  
舍公奚從後有萬年請眎斯集

嚴小秋詞序

騷壇接踵詩圃有餘樂府倚聲豔宜無側詞雖小道亦貴別裁作者端人不攬理語蓋其言情綺靡較詩有加卽事流連與曲爲近雅俳易判離卽尤微絕唱空傳古人不作以余師友之間同里汪存南先生錢塘袁蘭村常州楊蓉裳夔生父子錢塘家穀人先生皆稱能手今得交江園嚴君小秋亦其亞也讀竟全帙歎爲作家綜其百章良兼眾妙夫其史攬百朝材通眾製取精較富下筆皆工則恐掎摭太豐病於隸事畦畛旣化疏於立閑李玉溪以詞掩義晏叔原琢句如詩而小秋惟清故綺以少勝多長短調於詞律最嚴五七言與詩家不犯此一妙也又其慷慨平生疏狂年少俠腸則倚劍天外士氣則擊筑燕南一曲

江東止宜大漢數聲酒次恐損蓬材而小秋才原倜儻旨自溫  
柔刻羽移宮聲聲入律淺斟低唱言言當行晏秘書夕陽一段  
秦博士殘月三星縱極悲涼倍形深婉此二妙也又其產在青  
溪老於白社六朝煙月易患情多廿載菰蘆得無腸斷則恐酒  
家壚畔妓館歌頭任育長之癡代人墮淚江文通之賦惟別銷  
魂於是過莫愁繫艇之渡美人不來尋車騎吹笛之聲知音罕  
遇意迷於絲竹恨觸於山河秦女吳姬各奏贈蘭之曲酒帘歌  
扇遍題犁舌之詞芊綿皆女郎之詩惆悵無丈夫之氣香奩派  
衍誰障狂瀾吉席句收肯存穢語小長蘆釣叟謂草堂詩餘棄  
石帚詞而收胡浩立春吉席  
之作可謂無目而小秋好色不淫避世無悶不以感遇避入柔鄉不以  
鍾情墮吾綺戒無怨月恨花之句有滌脂靡粉之姿夫遠則溫

岐失志專作豔詞近則竹垞風懷有損盛德視吾小秋何如也  
其妙三也然而一江帶水握手無時三月鶯花賞心何事數昔  
款而雅才亡負佳日而良會少存南穀人蓉裳久歸道山夔生  
蘭村不見且十年矣梅子黃時都無舊雨酒波綠處自比晨星  
序小秋之詞望其保固心神珍重邂逅以追我憂適我願也

家荷屋侍御筠清消暑圖序

拒車馬之聲於六街薄帶礪之封於千戶披素襟而寒暄同貫  
抗清賞而陽雨皆宜月魄初升則荇藻滿徑風簫甫動而宮商  
中程長安居可一日無竹乎然而響絕鸞唵粹慕子猷之嘯志  
非鴻舉亦入向秀之林桃花縱不笑人飛柯得無謝客何地無  
竹此中有人吾見吾家侍御矣侍御生有奇氣早都盛名官本  
清華跡尤超遠佳士左右宜種修筠君子切磋好歌綠簣江湖  
入夢邱壑置身俠窟游仙不忘高駕笏床拄頰止見西山飲湘  
水之波在甯千畝寶湖州之畫伸紙萬竿乃命丹青再圖煙雨  
饑非咒筍直不彈蕉以槁逸神展初服而已每值十丈塵喧萬  
車波沸荷高露少槐大風遲君披此圖捉鳳尾而御虛呼鶴雛

而蔭暘落落自喜飄飄欲仙人苦赤馭之鑠金我喜碧霄之夏  
玉不亦迢然遠哉且君立鳴鳳之岡寶濡羔之節才爲樸學仕  
無輿援千秋之業則律呂奏其和四時之貞則雪霜堅其志語  
云松茂柏悅吾知此君先引爲知己矣

甲寅七夕集都門咏篁軒圖補序

飛觴曲水永和之迹易陳同乘後園南皮之樂已往古人盛年  
握手忽申雞酒之盟清讌娛心輒有登臨之感於是識之金石  
壽以丹青及駒過而追歡候鶴歸而道故况乎寄食京國浮蹤  
疾於蓬離邈響朔風秋意先於梧隕潮生汐落難尋去住之因  
地瑟天澄易作蒼涼之色招隱屠狗之市望古市駿之臺尤足  
張觸衷懷流連光景則有竝靈歡於月夕停逝景於星期憂一  
水之無梁惜萬年之長別索報章於河漢坐待闌干憶乞巧於  
江淮遙憐兒女諸君皆江淮閒人雖復一石不醉眾技畢陳興往情來  
能無珍重甲寅七月七日諸君集都門之咏篁軒時則荷深香  
暗竹疏露明幽蟲不喧秋花羣立安羊燈而漏永合鸞鏡而光

新薦甘旨於天孫，餽浮游之海客。瑤月先上，爭御驚鴻。玉山未  
頽，已見歸鵲。廣沈思於旅次，抒積素於良辰。柏本悅松，萍方值  
梗。履且忘趾，笙以燕心。坐有李生，能爲逸響。一聲既發，萬籟不  
揚。四座無言，九天如水。旣乃更唱迭和，絡繹連綿。懷響畢，彈舒  
意自廣。或吮毫索句，或擊鉢成章。歌樓畫壁之篇，樂府擅場之  
作。家子華卽席賦七言三  
截句胡子言填詞一闕或激昂素志，思酬國士之知。或旖旎

柔情善比風人之謔。

主人方綢繆薪束喜色動乎江沱迎接桃

根歡情濃於河鼓。有生新  
納兩姬畫眉餘事賦叢桂而留人，織錦靈心

鏤花瓜以供客。隨陽旅雁並慰驚求，泣露秋蘭不嫌苔。異抗風

塵之峻賞，樂志琴尊。續嵇阮之勝游，寓形圖畫。清門爲庶，肯寫  
佳士之真。仙客相親，不惜良工之苦。看短紈之平遠，曉化滄洲。



驚太華之淋漓晴爲風雨百世而下彷彿其人五百年來久無  
此樂未幾絕國燕宋歸志催人歧途東西去程易轍半生奢願  
不化雲龍小住前程空迷鴻雪歡場玉笛已帶離聲高會銀蟾  
偏臨祖席蕭游京師去諸君之會未一年圖中六人向識其四  
茲來道故肖生一人而已或爲貧求仕不卑柳下之官或傭食  
依人不遠灤陽之路謂張桂岩及子言亦有公子好士久客思歸謂江孟卿  
睽煙月於竹西謝風塵於極北采蕭獨處又及三秋羽絲相期  
虛云五日向之比肩聯襪把臂題襟者已對影如晨星各照顏  
於落月肖生乃謂予曰王郎托興傳檄煙霞李生紀遊起予屈  
宋縱橫一壑不數名山寥落千秋尙傳珍館立言不朽寓目成  
奇夫使金玉爾音將與管絃俱往某雖關蓬徑而地狹景蓮社

而代遙猶思在今有榮

願況宴章  
庶子宅叙

求夢既寤

穆員同德寺  
院會集序

匪子

有作斯集曷傳余愧其言爲識日月往因可諦證慧業之下乘  
來者難知誓壯心於白首

慶蕉園方伯遊金山圖序

夫外有造而窮雕鏤居無地而成截業與日月爲沐浴非風雷而震驚梯航具而境已超陵岸改而體則一海中有三神山吾不得而遊也偉哉金焦其若此乎然而鐘鼓聞於淮南浮玉之妙蹟較與人近矣況乎兩峯得友對互如列門萬井瀕深縹緲如泛宅潮汐合江海之流安危繫吳楚之勢京口所以據東南形勝也於是蒲帆初掛便請蕉堯茗爐將烹首窺清冽樓觀上躡可以友飛仙神怪夜明可以警頑客迴看重鎮可以閱興亡踞坐虛臺可以忘身世圍有弭節不來者哉然且侶漁夫於窮谷從釋子於空寮遺世獨往之子息形相悅之徒朝吸飛潮之清夕攬落霞之麗絕頂之鶴魂歸則將迎如夢隨濤之鼙鼓發

則振奮高歌若飮奇珍而不知貴似習大樂而忘其和未足稱  
勝賞啟新悟焉嘉慶庚午正月蕉園方伯以公事莅於茲與漕  
使程崔樵侍御相值寮屬從者皆一時之彥浩乎偕往翩然同  
登憶勘瀾於冬經勤視河於春泮禱漕路之達鷁首相望念皇  
事之劬鴻爪可認停鼓角於中流聆鈴鐸於上界叩虛飛棟觀  
妙崇基陰巖梅雪相授以冬心暖水鳧鷖共遊於生意呼景純  
和游仙之詩招和叔聽水仙之偈波濤噴哈移海上之情林壑  
空濛抗霞表之想忘其身之在官也既乃蕭衣冠歛神志瞻

天章拜先蹟思

軒駕之所臨憑依不遠觀顏碑之屹立堂構斯承則又不敢作  
避地之思遠任事之瘁耳雖以公宦迹所歷華嶽岱宗青浮硯

席天琛水怪氣靖戈船而攬高深之奇述家國之緒賦詩抒懷  
斯遊爲最若夫僕御之減大府過而水驛不驚供張之停行廚  
匱而僧齋可飽凡公所至輿人能言吾且略之作圖後四閱月  
以示全椒吳薰乃署其首而爲之序

陳曼生江亭錄別圖序

嘉慶壬戌秋八月二日吾友錢塘陳君曼生將之官粵東招都門名輩集於江亭而錄別焉秋潦不積雙輪自輕夜雨初霽八街如灑西山轟於林表青翠可招叢葦積於階下蒼莽無際墜葉在樹千林之聲未淒明窗背城五劇之囂自遠得地既佳選候亦愜駒影未中鷗侶斯集一邱一壑之寄小雅大雅之材簪履並賞無倥偬之懷江湖已違有浩蕩之志匏石異產而聲求松柏同林而心悅相與踐暑沙汀延清雲陸樂不設而寺鐘愈清言已忘而階花欲語瓊筵高設羽觴屢飛拇戰之劇雄若劍師觴政之行嚴於詩律金烏將戢玉山未頽主人滌硯於秋色之中伸紙於夕陽之外授仲宣之簡索伯時之筆既誌勝游兼

追離懷嗚呼年年槎至日日帆征聚散難言古今同嘍山陰無  
約忽駕扁舟虎溪有戒乃踰前限情來則跡踐興至則歡成而  
欲來日如初去塵未沫不有述作曷慰飄零況乎歲寒之盟不  
移於九炎月明之共罔閒於萬水流連光景慷慨平生風雨歸  
筆墨之靈金石護丹青之壽斯圖之作誰不欲附以傳者哉曼  
生以千古之才受百里之寄出山之泉貴其漑物觸石之雲資  
以活人而粵中兵戈旣少黍苗獨登大吏皆廉樂鄉爲最雪虛  
聲之恥康易治之民他日九穗之禾上之史館五瑞之形勒於  
石材其非徒圖中人之幸抑足信余言之不妄設也

揚州桃花菴餞行圖序

江淮之間人文代興唐宋以來揚州較盛單門典冊與煮海爭雄陋巷絃歌稱過江爲最本朝定制於守令外置鹽政一運使一董財賦之源比節鉞之貴食貨有志既易於分甘刑名不知較逸於守土在職者得以暇日吹噓寒林澗澤渴轍德水盧先生權輿於先朝南城曾先生津梁夫後進友教及郊島同指韓門爲斗山黨魁若秦晁羣奉蘇坡爲圭臬稍後廖先生復堂在官之日較盧曾爲少而許與下士扶將歧路繼聲接軌殆有同焉先生本以西蜀名孝廉作宰中州素無媚骨且完貞白用是不得志於上官將借他故劾之鑄職而先生志同仇澤才兼文武手擒巨憝獻之節府銜懸首惡炳於國法



天子嘉之詔以知府用賞戴花翎引見時

天語以罪人斯得王師蕙績爲先生先殲邪教渠魁之功再遷  
官至都轉領二分之明月照乃不疲攜四座之春風人皆自暖  
揚州詩壇之秀本得助於江山選樓之歸各傳業於黨塾又其  
長者多經南城君指授學有梯枕言無黃稗先生於是大開翹  
材之館重編題襟之集求五字於詩城儲三長於史苑高寒之  
地爲士所歸陶鑄之餘得人最富如送行諸君子尤所劇賞未  
幾先生以无妄之災被有司之議惜者朝野之公論戀者門牆  
之私情先生忠益慕君老猶戀國至於需次五年已及古人致  
仕之歲而宦興就闕蜀山蜀水之思不能自已矣昔年佳話曾  
見鶴歸此先生去官前數月事今日勞蹤自尋棠憩門下士臥轍徒攀游

門再慶於是具祖道之宴於桃花菴庵爲湖上祀永叔和仲貽  
上三先生之所皆曾官揚州者也先生揚抗風雅砥礪名節處  
腴獨瘠先生有罰鍰未去  
官卽典衣繳之噓枯皆生誠儒林之丈人亦學徒之  
廣厦宜諸君作丹青以永之而余與先生以通家兼古交何可  
無一言爲先乎先生廖姓寅其名鄰水人余者舊史氏全椒吳  
蘧餞先生者凡若干人

徐中翰同年浙從軍圖序

溫處士聘而祖席知其成功韓司馬從而方鎮因之協力然則載羣策於後車陪元戎之先乘豈徒誇賓客之美豫箋奏之才哉往者小慙未除大兵久費戰鮮敢死之士報非實獲之俘民久宴而易驚帥多算而不勝

天子赫然震怒命大司空那繹堂先生視師先生以將門相門之胄負能文能武之才家傳圯上之書夢授隴西之筆謂決機倉卒必資通藝之儒謂策勝嶮巖必倚周諏之力於是我晴圃同年實膺勝選遂著先鞭執囊鞬以從非公卿之薦墨經臨陣時晴圃於古有之白面橫戈此行不易山陟豕嶺天都之險道方居憂極武都玉壘之遙或見睨前峯後軍甲涇或解鞍大寨別郡烽

傳月已落而枕未安歲將除而糧亦盡崎嶇路失欲御風而行  
穹窿人還幸及瓜而代已歸繡袞喜色爭看試攬丹青驚魂未  
息痛定思痛亦云危矣然西行之始什伍愛僕射如父兄將佐  
使部屬如指臂同仇自賦吏不捉人有律之師民皆安堵幕下  
盡東南之美

兼謂葆巖西壙二君

眼前極雲物之奇駐馬草檄之餘訪碑

絕壑磨盾漸米之暇弔古雄州撫周漢之故都審秦蜀之門戶  
吟情益壯勝覽不窮紀行之詩與饒歌並奏磨厓之字與劍氣  
爭雄不其偉與尤可貴者蕭與晴圃爲鄉試同歲生而訂交在  
從軍之後每春明談藝夜雨聯牀坐請三薰別無十日苔岑味  
其蕙畝誼親晴圃胸有萬卷而如無一字飲可一石而不盡三  
榼雄情如彼雅度若此益歎盛世人才之盛與師門知人之明

也

消寒九九圖序

玉堂春夢忽警晨鐘水國冬心已逐歸棹理未荒之雁舍水北  
水南尋莫逆之鷺聲雨今雨舊採蘭暇日便筮盍簪飲菊深宵  
都忘落帽登堂拇戰少年之豪氣猶存選句鬚撚醉後之吟懷  
未減旣成誓於丙舍各踐盟於丁觚稚子頗解留賓良朋亦嘗  
湑我則有江子卿之耆軟紅夙契長安同作酒徒太白雄才小  
住遂通詩款入蓮社而襟洽啟蒿徑而屐叢訂雅集於瓊爐續  
古歡於竹屋望益灑干干之錦消寒披九九之圖一時如旌陽  
江晉卿丹徒張榕邨及吾邑王穆庭楊小溪汪柔兆程枕山及  
其小阮東昫來則不速別卽相思琴抱月而同彈曲停雲而互  
顧堆盤魚筍鄉味絕佳落紙雲煙客思能寫紅飛獸炭溫冷宦

之腸豔動鴛裙導老奴之笑亦江湖之好夢成萍梗之劇歡一日酒酣卿之授簡於枕山曰初日東南蕭辰易晚浮雲西北公子已遙成迹竟消古人所歎東山賭墅西園作書不有丹青曷壽來者於是乃爲此圖而蕭序之如右賦羣仙之高會強作駢文序禊瀆之幽情幸與末座

送費西塘同年奉使冊封琉球序

古今之學有數端曰性命之學曰經濟之學曰經學曰詞學最下爲科舉之學。年廿二以嚴命求友於四方多識異人。迺彥爲此數端而卓然有所成就者各有其人。其談性命而淪於老佛治經而局於章句者。著書雖多無取焉。若夫通古今成敗之由。悉生民利病之實。必先知於性命之源。不決防不膠柱。原本經義以匡俗濟物爲己任。則此數端理無歧出。亦立乎其大者而已。吾友西塘給諫用獻賦起家。早能爲揚馬之文。韓杜之詩。而恥以詞人名。常謂儒生以致用爲實學。病顧圖人天下利病。全書徵引博而未觀其備。抄撮詳而未據其要。乃復取十四經本文與二十三家史郡縣志暨漢以後一家之言。詳考博證。擇



其格物精論事確者編錄成書又審古今之異宜中邊之異俗緩急之異勢參錯權衡證以跋涉所歷見聞所周務求不漏不窳以利實用蓋立體大而用心苦矣

天子夙知其才適嘉慶丁卯琉球國嗣子請封大臣各舉所知以備使臣之選都察院官列銜例在後奏上時君名居十一上特簡用朝野咸服

聖人知人往者楚蜀小慙未靖君出參戎幕軍書旁午決勝奇中幕府將請於朝以君補四川道員君力辭蓋君汲汲於澤物而不亟於求進是真能立乎其大而不蔽於曲學者矣方今皇風無外重洋賓服非如漢唐使臣出疆必示威重厲氣節而後能達命以君殫心時務所過齊魯吳楚閩越登其山川知其利

弊河海之要領可以燭照數計明年歸必有嘉謨之獻以慰  
天子求莫之虛衷又不徒筆之於書而已此所可爲君慶兼爲  
蒼生慶者也戊辰二月朏齋與同歲生祖帳張宣武門外酒行  
樂止爲斯文以遯其行

送何蘭士同年 道生 之任圖夏序

三秦古郡聽伊涼之曲多六代故都徵花月之詞易然則風騷  
壘主今古代興固運會之不移亦山川之有助同年蘭士先生  
家世爲史人各有集貫精心於象甲取上第於鵬辰誦汾曲之  
詩生才得地踵水部之韻吟香在官遂領諫垣屢校文苑經生  
廉吏並在門墻柏府蘭臺雅宜述作乘驄馬而出齊魯風清建  
隼旗以行江湖波靖遂以其暇拍觸雲之石航落星之灣攜奇  
句於丈人峯頭發高韻於小姑山下而又泉嘗濟沆道涉江淮  
落日訪碑破庵揚鼎藉古人爲投魚之蚓袞異聞爲搏象之獅  
萬境入懷千言脫手蓋所歷之地逾多而得句亦奢矣然而詩  
富而家以貧民肥而官自瘠鏤刻害乎眞宰送迎違其素心君

於是以疾去職逮於復起乃授今官夫圍夏者羌戎之舊俗勝朝之重鎮

天子知人于此信矣而鄙人獨爲君慶者賀蘭山下駿馬羣奔沙州城河浮圖倒映峪風旣煦柳照月而紅羌管初吹地無霜而白夾黃流而醞酒道紫塞而停鞭君旣善撫其民又能不輟其業行沙攬怪入峽探奇弔割據之故宮問奢延之古渡得句摩高岑之壘入樂參燕趙之音以視向之出入東南流連煙月緣情綺靡寓意芊綿所詣必更進矣客曰君名太守也值宵旰求治之朝領戎夷雜處之地子不敷陳治譜斟酌俗通進緩急之宜道剛柔之會而惟張風景之雄快勵詩境之恢奇偵也不知風雅宜人中和率職昔編所著善政攸微詩不足以言志哉

客請無廢斯言矣

董蔗林相國七十壽序

昔在重淵重輝之世同心同德之朝建八柱以承天配五嶽以鎮地則有百寮冠冕一代羽儀星應輔弼之垣夢授絲綸之筆苗畚清節經緯壯猷金飭賜而風雨皆時沙堤築而堦甍相賀上公在位歷師保傳而道尊元老陳謨兼功德言而年永官非典午丹青圖決策之功詩頌生申黔赤知降神之日是則真情鼓鑄至善陶甄培元氣以召休嘉本太和以登仁壽有不天加歲月春滿桑榆報陰德於及身挾靈光以駐世者乎求之今日我師富春蔗林相國斯其人矣夫其靈毓芝生慧通珠記名宗守硯樸學傳薪一目而十行俱九年而七經畢先文恪公以浙東名彥領朝端禮官望實兼清質文相洽書偕人老學與位躋

習漢威儀通唐典故公觴辰論鼓門子補笙數事而箋注詳成詩而耆碩避文恪公知其非常兒也養其澤物之身教以匡時之學韋平相業得自趨庭裴李卿才培於入塾而公又研精七略選勝九流瀏覽茂先之三十車博通歧叔之五千卷既登上第灑翰神山旋入南齋簪臺仙禁飄風播雅卿雲作歌柏梁之詩首聯廣閣之句躡續或賜觀寶墨而和章具於屬車或召對中宵而頌什成於待漏逢兩朝盛典萬壽昌期範日模天藻山續水音和于球石義實乎班揚頌

堯醲舜醺之化無諛辭依宣上通下之例無曼語每賡一冊輒錫兼珍爲

皇祖寫佛經則梵音詳釋爲

純皇纂實錄則堯典親承以至圖禮器而能辨商彝領樂部而  
妙調軒管會典佚存之重本紀法戒之詳宮史國史之修清文  
唐文之輯靡不網維館職領袖國華至于軍實官常舊章前事  
顧問初及敷陳已詳而且視聽不衰春秋正盛胸中強記尙較  
勝於後生燈下細書不借材于幸舍此師學之贍藝之工益進  
于中年也公風度清嚴規儀端整臚唱時

先皇帝喜蘇瓌之有子貴杜預之多聞遂邀特達之知不負非  
常之遇歷冰銜而盟心版持水鏡而坐頭廳未躡宮詹已遷閣  
學嗣是平成水土李栖筠儲宰輔之資稽綜銓衡裴叔則擅清  
通之譽由水部而轄民部北斗奇喉舌之權以春官而兼地官  
元首倚股肱之力旣升揆席仍直樞房四輔階崇三典刑肅執



法則霜栗吹氣則春溫五十年遍躡華資左右手不離香案武  
英領書局四庫本總其全文華啟相垣六部疊長其五溥天休  
泰人知元老爲金城比歲和甘神報公忠以玉燭然而膏黍但  
能爲兩籌筆未畫浚煙柔翰無功毛錐不武亦缺事也公生兼  
上相上將之才逢乃武乃文之

聖虞公寫像官本瀛洲鄧侯居中勛在幃幄筆削方略書十武  
之全功出入軍機贊百爲之密略曩者小慙未靖大帥其勤三  
省用師八年籌餉公實始終其事天心助順

廟算擒渠師如水而百穀甦令若雷而羣岳震起帶犢佩牛之  
眾復事耕畝集風驚鶴警之民胥歸安枕借籌聚米

帝曰二三臣同勒鼎圖形名與廿八將敵此又師政之優功之

懋宜享此盛名也且夫芝誥秩三公不若列名祀典護堂登八座未如拜寵天章惟

先皇帝與

今上廣孝治於官方慰重臣之孺慕方公入相時母邠太夫人猶在堂也膝前梨棗召元輔而分甘日下公卿率都講而祈壽絲竹不設餐膳有加初度賓來上方恩至內使口宣

天語中堂額設宸章太夫人率師九拜如儀三呼受賜鄉鄰驚寵歡騰承慶之堂日月依光淚溼紀恩之地暉生翟第齡益松筠邇者嘉慶十二年柱史書成笙詩宴啟稽典敷典念恩推恩則文恪公奉

特旨入祀賢良祠春秋俎豆馨香賁及先臣班馬弓裘撰述光

于家學道符一德溫綸彰忠孝之全饗暨億齡至性洽天人之際而且一品之蔭才子特昇以星郎五福之頌昌辰數將以雲翰崢嶸世職纓笏溢於曾來駢疊恩施雨露周于冠履樓臺無地賜居看卿貳移家筋力有餘入直許驂駟代步人臣之榮備矣

天子之眷篤焉而師匆匆在位抑抑惟隅居盛滿以罔柔受機宜以縝密蓋通仕籍者四十五載在軍機者三十一年廣殿之筵取一柑而僅見溫室之樹對諸子而不言足民裕國之心自著鞭於皇路慮滯戒沖之學仍銘座於官防寶泉寶源摧兩局而鑄金無蠹內府外府兼三庫而司農自貧位則上公家無長物本祛犬馬笙歌之嗜長此簞瓢疏水之心此文師度之下德

之清宜荷此隆遇也國家春秋書能賢良射策羅千餘篇於進  
御陳三大禮於時巡本多書雲賦海之流兼藏捧日濟川之彥  
兩朝聖人以公瓊衡在手星宿羅胸似崔光之善知人兼陸贄  
之無私謁嘗資藻鑑用選桐椅公秉節江南則吳楚之英奇出  
掄才冀北則中外之耆碩登七番讀卷于殿庭六次閱文於輦  
路近則禮闈選藝學府觀人傳衣鉞以金鉞收珊瑚于鐵網知  
珠識劍索邦珍於川味巖枯撥霧披雲迓國士以洞朗軒闕軋  
茁抑而文體正關防密而士氣伸如影隨形猶聲答響神風接  
引導仙侶于三山甘澍鈞調植春花於四國頌者或曰生徒已  
遍天下或曰桃李盡在公門而況同年並掌鈞樞費相協揆尙  
稱弟子戴相儒術以爲師友源流之美詞林以爲文章福澤之

兼而公方以泰岱揖羣峯溟海受一勺幽谷之香必擷單門之  
技必揚說士如肉甘庇寒思履廣稱宋邢於鄙鄙識令僕於微  
賤宏獎文心旁周繪事不以國工示璞不以門業矜能此又師  
誘掖孤生許與善類能召茲來祐也夫蘊源莫厚于江河故行  
地也遠稱物莫平於權量故利用也長以公性學兼修如彼  
君親並篤如此膺純嘏享大齡宜也某幸陪顏鑄遂許予雕窺  
數仞之墻入三薰之座學山不至言海尤難惟名誨之耳熟能  
詳庶初度之手仇可侑上珍鴻藻錫長庚以頤更老之齡縣鳥  
華桐先上已而踐金匏之席問聃錢之歲閱春秋八千而顏新  
祝韓杜以文效駢儷四六而背汗

阮湘圃太老夫子七十壽序

蓋聞河源萬古崑岷之流長霖雨九州嵩岱之積厚其在人也  
地靈所貺隱德食報於門才星精誕生和聲召休於神聽伊古  
樸學輔世延墜緒於微言盛德匡時拯生民於末俗比於六鼇  
鎮海七曜輔天功良偉矣業且久矣然考其初必有懷珠抱璞  
之彥棲霞挹月之姿坦道履幽衡門勤誨詒君子之穀比櫛崇  
壚具天爵之尊韜鱗掩藻於是文章之草根大於靈芝旌節之  
花蔭成於壽相茲於我師門見之矣維我太老夫子阮公家傳  
顏柳之訓世知嵇呂之名鐘鼎器尊宜位於宗廟桂椒馨遠自  
寶於山林虎帳陳詩親觀講武鯉庭受命習聞教忠蓋公生大  
將之門爲名臣之子當夫馬援眎師韓宏籌賊畫九地九天之

策督百戰百勝之兵帶甲心齊韡刀志壹馳驅丁甲鳴鉦而壁  
壘朝新跌宕風雲聞鼓而機槍夜淨時公侍安於旌麾之下博  
歡於鋒鏑之餘戰士同勞戒養則猶賡笙雅元戎多暇勸勤則  
兼受兵書追乎三礮受降九谿歸化六月奏平成之績三殿旌  
勸定之功

帝鑒精忠人歌遺愛說劍橫戈之地已建專祠張旆列戟之門  
曾無長物所謂象畫丹青心貽清白者矣於是公簞瓢樂志弧  
矢懷恩發楹而箭譜猶存守硯而陣圖能設顧以昔日者出坎  
曾占全師匪易意氣貫金石神明協著龜置危地而後安繫傷  
門而乃吉慈闈述事心悸於決策之初孝子守身神忱於銘勳  
之後公謂文德舞干之代熙朝臥鼓之年報國不更恃枕戈傳

家詎專資磨盾捧珠璣之集儒將風流憶鐵馬之聲勝兵露處  
四海尙思頗牧此家已產荀陳烽火靖而國士身閒煙霞腴而  
幽人德立凡夫蓬戶卻金之節棣園讓棗之心指囷卹孤之仁  
停車解紛之義一身兼粹六行並完江淮瞻處士之星吳楚還  
人師之杖公謂門基宜擴家學能綿高情自愜於林泉宏業方  
需乎黼黻開鄭賈之塾貴經訓而賤詞華儲姚宋之材惡虛聲  
而崇實用琢磨清節養正於觴牒之辰揚厲嘉謨觀效於封疆  
之寄我師中丞經綸則韓富器則顧而兼廚節概則顏原道則  
夷而兼尹綺齡少作慶雲華日之祥高步隆名北斗泰山之望  
六書研椎代惠戴而任斯文四國旬宣總內外而觀所學君臣  
一德兩朝倚柱石之才文武兼資六籍備鹽梅之用率吏則霜



清百邑湖水含澄督師則波靖重洋天風助順此皆公嚴訓之  
誠長善之報也而況德與年峻祥以時駢惠在儒林多士上臺  
萊之頌慶周海國萬家知覆幬之恩立德立功立言不朽之業  
三世多男多福多壽太和之兆一心公卿不慚斯爲門範仙佛  
不貴專拜經神當政成海晏之時正福集川增之會自

天露湛綸言光續命之絲所治春多蘭路郁宜年之酒固休嘉  
之極軌實經術之殊榮某韓門弟子知積功累行之詳曾子門  
人聞沂水舞雩之志茲逢初度特獻蕪言愧非小雅之賓請上  
大年之祝

吳穀人先生七十壽序

嘗論日月重光之世蠶穀旅熟之年含生受中延洪自上和光  
塞宙純嘏錫垓三朋同體於巖廊九老式型於井黨徵文可券  
積算攸符我國家鼎祚齊天祥源合節泰元芝應靈祉蟬聯至  
善陶甄精誠鼓鑄

一人頌福而麟鳳育元老陳謨而風雨時建八柱以承天配五  
嶽以鎮地別有藝林弁冕儒術羽儀以早休敦廉讓之風以久  
視畢源流之學幽人素履天澤符貞吉之占空谷遐心金玉中  
優游之則有不天加歲月春滿桑榆徵陰隲於及身挾神仙而  
駐世者乎求之東南之彥誕自江海之靈如我祭酒吳穀人先  
生斯其人矣先生家多真隱世受古經生秉星精養成風骨峭

直本其眞面和易動於天倪其爲學也居隣宛委之藏夢檢鄰  
媛之祕業專門之業旁及九流言先王之言兼通二氏不以經  
生自畫訓詁本精不以博辨爲雄包羅特富偶尋僻典駢番如  
數家珍多識舊章碎小能徵國故聚五金以利用鑪錘在心蒐  
萬象以寫生丹青脫手其爲文也深於忠孝之旨嚴於雅俗之  
分屬詞不離情性之眞比事必求工力之敵交滿紳笏而無上  
宰相之書筆有圭稜而無廣絕交之論擗擗羣籍汰沙簸糠縱  
橫萬端穿楊刻棘一時推爲盛作餘事可了十人填詞之名接  
鄱陽試帖之律如杜曲當其觴辰嶄角象甲羅胸執牛耳於江  
淮翔鳳毛於蓬島值

堯醜舜醜之朝多慶典繪階平川晏之實無諛詞景星慶雲海

宇快於先覩芝房寶鼎樂府薦於明禋附神筆於連城倚卿才  
以華國命蘇軾司兩制實儲宰相之才詔賈逵侍諸王特選人  
倫之表而先生望雲意迫愛日情濃春晉華資秋辭朶殿鮮衣  
葵外夢溫室之樹榮紫實筵前說廣庭之柑美稻香葛嶺仙米  
親炊水滿蘇堤肥魚自釣用是捧輿晴雨尋舊樂於丁年治事  
松楸覃孝思於丙舍烏報隆焉虬資遠焉唯先生以本行之醇  
發大文之粹由孤懷之潔成高響之清所以表禪幽光發揮獨  
行文而不史思皆出神可以動九幽可以質百代同鄉梁山舟  
學士矜重其手翰不輕爲人書丹自朱文正紀文達歸道山後  
惟先生碑版之構爲書之方先生在書房成邸以河間之修學  
兼淮南之好文於師傅中所欽服者謝侍郎金圃錢詹事辛楣

汪修撰雲鶴與先生四人而已行則顏閔完品文則燕許替人  
四嶽所宗百川能下每遇單門縫掖一字璆琳扶將不啻在身  
吟誦未嘗去口吹人如春煦說士如肉甘務使仲宣名成太沖  
賦貴至於收奇觀於杖履弔往蹟於山川攬高深則本愜素心  
道興亡則足資正史行稿所編如校書興京時拜神臬眺長城  
登岱嶽躡日觀俯石閭洋洋大篇可以資臥遊矣近則津梁未  
倦腰腳非初往歲可以盡千杯今茲未能傾十榼然而尋秋避  
暑餞春消寒領袖羣英流連四序風雨不害童冠可偕索句先  
成縱談無倦蓋主忠信者金石同固豐道德者聰明不渝老手  
之述作等其身昌辰之官銜稱其學茲值七月之吉剛舉七秩  
之觴青眼照於蓮臺黃髮明於桂嶺日邊朋舊陳昔款於新詩

門下孫來祝遐齡於初度某松心相悅萍跡尤親數兩朝之  
光巋然喜諸郎之鳳毛殊有托通家之誼羣紀久要誦自壽之  
詩杜韓復作八年德水傍湖海而飲和千古名山共生徒而問  
故受文中經術將相羅房杜之才記柱下史年甲子媿賸錢之  
歲

蘇東藩先生八十壽序

代

文田己未舉南宮同歲生二百有七人其上侍重闈者惟霑化蘇樸園侍御鸞坡退直補馨膳之詩鳩杖承歡食含飴之報清第科名之盛足爲親娛吉人文福之齊方伸祿養一堂四世咸爲樸園賀也而樸園甫登上第卽賦皇華已搜瀆海之珠又藝禮闈之燭手栽桃李春滿蓬洲心有冰霜秋澄柏府樸園遇雖隆而容益下名驟達而度自沖佩祖德而循牆銘儒箴於傳硯訓成顏柳恪守清風系衍公卿並無慚德式兩代人師之範奉三朝健在之身樸園文行之良夫有所受之矣令祖東藩先生生東魯文學之邦傳西京經典之詁精言妙理賈鄭傳薪醇意高文班劉奪席先世爲清白吏家本長貧夫子貴德行科生有

至性夕葵庭院三牲勞負米之身春草池塘五字入聯牀之夢  
諸昆有集業其名山十斛能分澤如時雨鷗情易狎龍性難馴  
自愛初衣漸入佳境所居在鉤盤河之陽依柳爲藩種花成塢  
桃錦千千鶴聲一一釣絲甫理琴絃又安野老提壺來問齊民  
之術園丁立約譜成格物之書況十畝之同心早儕冀缺而六  
朝之選學已付徐陵尊甫封公陳荀德星嵇呂人瑞養沂水春  
風之志善誨曾元習權書機策之文再傳蘇過樸園耕治經之  
墅琢蘊璞之規大鳥一鳴神魚三躍桐花萬里竹律六筩人以  
爲國士之出不凡我則謂門才之培已久也先生道德能腴神  
明本固鹿車鴻案並頤邁軸之年月地花天小試神仙之樂值  
嘉辰降乙才子笙庚別業苞宰相之花前廳概科名之草封公



率諸弟與諸孫捧觴上壽喜可知也鸞章象服耀長者之萊衣  
芝露松雲萃門生於馬帳托皋禽而寄曲白雪廣詩接庭鯉而  
陳言青雲結響此文田所爲樂與其盛者哉從公瑾升堂未知  
何日佐伯瑜侑爵當及此辰所愧布鼓雷門終讓許國公之筆  
其祝添籌海屋試拍浮邱子之肩

覺羅恒觀察年丈五十壽序

蓋聞同天誕德真麟之定亦仁沐日分輝若木之支皆壽所以  
映青藜而校字特數耆儒開鴻寶而著書且多仙骨分藩地重  
盟海岱以同休祭酒名尊問春秋而未大況乎

五朝忠厚德光首被於懿親四海吉康人瑞先徵於公族推恩  
而麇鶴集齊福孔多敵愾而赦鯨封敦仁乃固迪休和於江漢  
道協維翰勒隆鑠於鐘鏞年剛服政部人稱兕歌軍中奏凱之  
詩海客投桃聯膝下登瀛之譜此豈非慶餘家積材篤天培膺  
弗報之極優應貞符之不曜者乎口口年丈寶樹含英銀河潤  
秀周官園子六藝皆通漢代經生三雍早對一統易列侯之職  
賦政則仍恃召郇三軍奉尺箠之威同姓則新產韓范清資敷

歷兼內外以宣勞碩望巍哉胥文武而爲憲徵諸眾善非小言  
所能詳震於隆名或大端之可舉且夫神龍之種豈有凡鱗儀  
鳳之朝是尊寶胄或附同生之肺腑桐以戲分或念開國之瘡  
痍珪教世襲功名非由自樹恩禮略與眾同公家有誓書勳存  
宸宇酬恩葛芑昭忠入特典之祠虛意蒲披好學詳儒林之傳  
厥惟中葉乃出隱君守硯以貽握瑜不仕先恭愍公公忠籌國  
精白在官始邀

高廟之知歷踐貴卿之位公研精文府設禦戎行符

帝簡於九重見福星於一道圍腰紅繫託體原尊數腹丹傾承  
恩獨異公子受鯉庭之教馳鸞掖之聲遂以文心光其門業此  
公之世勳也蒼生望急匡時詎逐名心黃祚多才應官亦循歲

例然而越王尊之坂自是忠臣斷溫嶠之裾終非完德功業高而性情薄樹立早而定省遲縱王事之靡鹽亦天資之未厚也公生膺世職騎尉可以展庸試入中書選人久當需次而乃循陔眷戀陟帖瞻依當恭懇公督楚時公念佐幕需材潔饗誰恃古人云爲子者一爲臣者眾又云事親日短事君日長且抽未仕之身專就無方之養鳳池非遠願酬烏哺於百年椿蔭方高敢忘草心之一寸承歡帥府參畫親闈令公出則將車以從家督尊而浣綸不假邇者芝明子舍草綠仙洲院長資揆藻之才郎君切望雲之慕

公子桂芳館選後院長奏充辦事翰林公子志切省覲屢乞假

永惟孝則勿

替穀貽此公之內行也金曹利藪度支係夫邦財玉粒民天轉運關乎物力鹽鐵值昇平之世處沃易豐舟楫當漢廣之衝募

羶羣赴非圭稜之自峻將蠹漏之難彌公入會廣輸出籌程秭  
百粵之精華所匯三湘之職志攸存邦儲蒞以精勤家法守其  
堅栗白華旣補衣有素而無緇清抱自持冰在陽而不治自恭  
慈公衣披一品位次上公秉節黔雲建牙楚月迨公再居方面  
親踐上腴身似書生家無恆產公子奪魁藥榜領秀槐廳鶴禁  
簪毫鵲枝寄宇樓臺無地詩人述廉吏之貧徐司馬贈公子桂  
芳句歸去樓臺無  
地起傳來瑤  
島有人居章杜近天詞館作寓公之宅此公之清節也嘗論  
經濟之士亟世務則章句羞言政事之科遇專家則文章必遜  
於斯貫札者七於彼避舍者三道本萬殊藝難百試公古今其  
貫仕學兼優採瓊於羣玉之山弄珠於百琲之穴秘書博檢別  
淮之謨胥刪國史分編班馬之香親擷賦心分授教成華國之

才選學再傳名冠集賢之院此公之文學也又論楊劉述作之  
彥執干戈則僕病未能龔黃牧守之良謀將帥則某非其選況  
乎任非專閫驟提不習之兵民未知方竟用久安之卒色沮於  
聞鼓令格於踰溝而欲兵如下九天賊不過一步旅事未學戰  
功難貪公仁能得士心忠能作士氣屬以逆民螳怒狂寇鷗張  
蔓延秦蜀之郊火燎荆襄之界公一軍塞險隻刃當關撫衽席  
之驚魂鼓疆場之鬪志設覆夜郎之卡宿櫟郎子之鄉率鄉勇  
則馬首是瞻遇國仇則旄頭自射耿恭藥矢奇計如神光弼鞭  
刃親身入陣而又其偏裨之食撫猛士之瘡慰安則先及難民  
招撫則兼開生路以故三軍之愛公也如歸召父羣寇之遇公  
也如撼岳家此公之武略也若夫周官司寇典用重輕鄭國大

夫治通寬猛非撫如續挾則窮谷難同非笑若河清則豪田久  
奪所以優柔之吏計紕於游俠之誅武毅之才術短於流亾之  
聚公德心陳夏仁術敷春土豪不敢攫其威江神無所滋其虐  
值潮騰白馬峽溢黃牛夜聞升屋之呼午鮮炊煙之宇公沾塗  
問苦勞人忘觀察之尊扶掖知歸童穉喜慈母之近及其讞疑  
石首勘地華容片言釋兩造之爭一怒罷三年之訟田防既定  
正疆而并黨騰歡水利難專執法而豪強奪魄直攜甘雨親灑  
茅簷未識明霆請瞻鐵面此公之吏治也至於陰德善藏大猷  
徐展非管窺所能全紀非筆載所能預知要以鼓鑄太和導迎  
善氣宣力慰股肱之倚立德立功葆仁滋膂力之剛壽身壽國  
可久賢人之業不貴躬桓無期君子之年休誇仙佛某等與公

子香東李韓並舉得聞詩禮之傳虞孔同登兼述鐘鏞之績屬  
以大年逢吉初度迎曦歲紀長庚節臨端午劍橫蒲翠辟邪占  
氛祲之消酒浸榴紅續命煥彩絲之結寫像於紫光閣上勳第  
松喬稱觥於黃鶴樓邊晴川草偃捧三辰而建旗鼓洗甲及時  
驅六丁以掃欃槍守申益算香東目馳蓮府心蔭椿庭方效職  
於掌綸未酬恩於舞綵乃徵駢語用侑華觴紅旗上獻馘之功  
丹綽誇圖人之政雅材多愧亦附笙吹武德方隆仍庶鏡擊光  
華被洽萬年捧東上之烏忠孝稱延百歲舞南飛之鶴



南昌黃圃菴年丈六十壽序

蓋聞喬木之植踰千歲而苓生太璞之完薦六宗而穀蔭何則  
質堅者道壽理粹者履祥也伊古大家明德之馨舊史世官之  
系國華黼黻門業崢嶸鳳于陽而羽毛成鶴在陰而笙簧協其  
先必有獨行過人之事恆德駐世之儒高其志于鴻飛厚其謀  
以燕翼勸以紗帷之教同投六官祿以古錦之章並興七學用  
道德而開文苑由隱逸而起卿門息息相棉隆隆未艾茲于封  
公圃菴先生徵之矣且夫鋪張奇蹟或非無愧之辭巖續公言  
轉昧必傳之實人生大節固有數端莫真于骨肉之周旋莫劇  
于根本之芘蔭吉花榮于棣宅和氣播于蕭墻此善長之大綱  
而仁壽之大券也先生幼失恃王公滌綸之恭穎叔遺羹之愛

未之聞焉其事太封公也蓼莪咏劬白華誦絜居先溫席出必將車古人有之無足異者乃若樹荆增感春粟成謠此自外于彝倫詎可儼夫端士然而貴人易傲式里或異于人猶子方瘡眎疾較疏于子諸昆之間有慚德一門之內乃殊觀春秋長而捧衽漸荒參商應而分甘竟漏惟先生之事兄也如事父焉牽車遠道高下扶持侍杖中庭憂愉合併四時疴癢抑搔不啻一身白首冠婚稟承未殊嚴命而又連枝之氣推煦于竹林同被之歡分溫于芝樹或蘭莖早折髮淪于一夕之悲或瓜實未延膚切于千絲之續此卽漢之第五倫唐之元結何以加諸若夫莊嚴土木每貸潤于旃檀安置杠梁亦越樽于郡邑黃金喜捨白屋爭誇公則曰求福者君子之所羞濟眾者聖人其猶病親

親之次賙鄰里恤童僕人爲貴也瀕江之寺文忠之帶未施洛陽之橋端明之碑有待省服食之費廣胞與之仁稱量而施惟力所給其大者曩歲南昌饑鴻集大都燕巢曠野支蓬露處依樹風樓公則乘月黑而播青蚨映星明而省流鶩厥曉貧者囊滿不知所由來焉功德多而恥弋其名孤寒育而並忘其力澤人者大年舍已者多福洵哉先生方琢磨國器陶鑄門才庠塾養其英華子弟從其忠信賤萬金之積貽穀書林完眾說之郛闢垣史院長君俊民同年頡頏賈鄭揖讓機雲五家守前輩之型三策衍大廷之論日邊珥筆承鯉對而書思柱下掄才依龍飛而占吉方今紳笏首數西江南昌相公大庾司空公大司馬公新城學士公一堂鵠起累業鸞振蒼生仰舟濟之功

天子誇門基之盛俊民與弟範亭中翰猶子載奮儀部駢枝蕊  
榜接踵彤墀簪笏已慶夫珠聯桑梓共推夫鼎立然則爲善之  
報不亦厚歟先生與夫人繡厓挽鹿並頤邁軸之年霞塢扶鳩  
小試神仙之樂值喜辰紀亥才子笙庚德風扇而春登祥日炎  
而冬愛山隣大庾先開宰相之花水汲西江自漑科名之草托  
皋禽而寄曲白雪徵詩羅松鷺而陳言青雲結響某李韓並舉  
盧鄭同師習聞範世之言預誦引年之瑞佐伯瑜而侑爵當及  
斯辰從公瑾而登堂未知何日延禧海屋唱浮邱積億之籌道  
美詞場讓江夏無雙之筆

懷蔭齋觀察七十壽序

蓋聞澤人莫大於江河其行地也遠稱物莫平於權量其利用也長國家書德勳門簡材清第倚爲指臂布之腹心屏翰中偏網維內外宣

堯醜舜醜之化車至兩成持清淵平石之心威行霜霽自操利器錯節不驚亦掌兵符活人愈眾帡幪成佛國所蒞之地皆豐茂憩有甘棠旣去而思益永是則善心鼓鑄清節陶甄培元氣以召休嘉本太和以登仁壽有不天加歲月春滿桑榆報功德於及身挾神仙而駐世者乎某得持此說以壽我觀察蔭齋公矣公系承七貴書受六韜褒鄂圖形徐常賜券丹青國史勞紀入關清白門風貧仍立壁履簞瓢之境頭角崢嶸生將帥之門

冠衿蘊藉寒雖葛帔國人知懷玉之身貧闕紗帷鄉校假儲材  
之地奉折奠之訓門子循陔慰守硯之悲觸辰鑿壁發楹者自  
憐其孤露遇塗者已指爲祥雲迨乎游藝國書服官水部白華  
賦養升斗不辭紅藥吟香絲綸遂掌相攸蹶父喜得韓侯當國  
韋賢深知楊傅甫辭秘省便試邊疆公之澤民自茲始也竊謂  
不履膏腴不足以彰志潔不甘淡泊不足以御福長公權推粵  
東督稅京口暨總藩所至皆財賦之區也檢校重洋之貨殖樞  
鈐五曹之度支寬商力養民氣以厚其原禁豪奴懲猾吏以正  
其末陶無窳器蟲不害苗山海財通利皆歸國租庸額足役不  
病民服官將四十年素衣未緇陽冰不治高轅列戟內衙屢撤  
笙歌晚節懸車上相竟如寒素葆堅白之志成松柏之年公之

宜壽一也且夫滯穗時和百穀仰吏心爲豐嗇大川舟楫九重  
託民命於旬宣乃或給於吏才疏於仁術去民遠而斷甕隔膜  
治賦工而空軸棘心又或湯禱未符堯年多潦釜區之賜皆出  
聖恩饘粥之分均關生意挹注全憑德水俵散易成漏卮公在  
潮州賑風潮災在皖城歷辦水旱災暨爲京卿特奉

旨查大名賑親履泥塗周咨疾痛府史之奸皆燭照不蠹官錢  
黔頌之氣識棉溫實糜私俸萬聲皆應進瘖者而撫之八座自  
尊招暘人以在抱魚骨起於溝壑兕觥祝於堂皇公之宜壽者  
二也又使五方之產不具則儲材約而未豐九攻之術不全則  
應敵變而遂絀爲政之道何獨不然是故孫奭雖訥而敏於當  
官糜竺頗雅而短於幹翮更端易竭遷地弗良公敷歷八州回

翔九棘

聖人知其更事同官怪其多能凡他人易挫之鋒皆我公有餘之刃或典軍興驛務或浚運道險灘或籌苗疆善後之宜或勘渾水挑淤之路通敏如任智局安定如樊清鄉照遠速於吳淞之叩鞍借籌明於馬援之聚米公之材力愈用而愈出公之聰明愈老而愈強公之宜壽三也昔者翁孺活人自知有後歐陽秉燭每切求生然或姑息爲仁優游養賊信小言之談因果謂大度之貴包容竟納山海之污乃縱萑苻之盜漏網者自謂得意戴盆者但可吞聲一笑百啼良枉克肆不足以道迎善氣扶掖窮民善哉公之言曰過嚴非也故縱亦非也要須刑罰得中耳官普圖陸豐時誅通夷之僞職搜奪貨之巨憝穴虎皆擒沙



蛇不螫而於池州疑獄然犀照魅秉鏡知寃李不代桃僵甲不爲乙患鷹化而慈烏聲樂莠去而良苗意新陶鑄元功吹噓善氣利周白屋慶集丹心公之宜壽四也從來一德之孚敷心寮案同心之利觀效馳驅自畛域易分則此秦而彼越成敗預揣則先私而後公吏議徒嚴人材難恃公攝高要時知其地甲長之設半卒伍雜充而歷年地丁之徵恃將弁易抗乃推誠置腹弭釁和衷冠劍雍容射飲嫺雅召武夫而講大義鄙人願爲前驅嚴逋賦以完正供營弁不敢左袒其觀察松太也奉檄勘定江浙洋面地界有洋賊之警有海颶之驚公出不設兵行不避險直冲浩瀚徧履巉巖長嘯登舟高談揮塵如謝傅之航渤澥若坡公之辨石鐘軍幕媿其春容儒林稱其鎮定迨乎洋面旣

身... 卷三  
分人心咸服飛章疾奏立碣永垂積疑者發蒙而定案諉過者  
知罪而不寃其藩楚也識司馬傅君惠在苗疆識兼戎事虛已  
任之相與指掌而論邊備借籌以靖人心屯勇留則防禦全兵  
不調而有恃均田立則耕作適民有產而忘爭無我之道有常  
與人之善無量不尸功者天所報不避怨者

帝所嘉公之宜壽五也值親政之年下求言之詔公鈎稽六典  
樞轄百爲崇議可懸之門嘉謨屢書於笏定蒼生受福之矩獲  
剡吏人軌法之萌芽至言富於賈山偉識峻於李渤錄其治譜  
與年譜而並詳誦其德言暨德星而較近然則公之延釐益壽  
豈可量哉公之諸郎擅揚馬之文兼鍾王之藝或明決足以折  
獄或敏贍足以理煩承公報國之心畢公澤民之志衍休未艾

啟緒無疆今年九月十日爲公七十初度吳萸插後人健於仙  
酈菊開時宦成可隱年家子伸拜慶之儀續登高之讌親見公  
看山下飲水城南樂閑忘簪笏之榮分甘樹芝蘭之秀又或  
曾依仁宇歌于爲於童年屢侍飛觴聽雅言於末座敢忘耳熟  
敬侑手仇書德政之碑頌聲已滿於天下申期頤之祝蕪詞久  
刪於筆端

汪織軒同年六十壽序

代

煥秉節揚州多識江淮閎恢奇閱博之士全椒吳孝廉山尊其一也山尊通經術能文章出其所作直造古人煥徐詢其淵源則其里門所師事者卽煥庚子同歲生汪君織軒織軒山尊之從舅也授經其家者十有一年故山尊之學皆出於織軒而山尊尤稱其師篤至性敦內行如唐書獨行傳中人今年三月煥年家子汪孝廉上章來爲存南先生門子存南亦全椒人熟精選學以文伏一世與織軒同見賞于金海任太宗伯相國梁文定公其子能世其學煥與言其宗人之賢者道其家學而外則亦數稱從叔祖織軒先生煥以知山尊之言信五月山尊復來居揚談藝之暇乞一言爲其師壽山尊深于文例者也以文爲

壽非古也自有明歸熙甫始有之受者非其人則言易慚作者非其人則言易放織軒文行表表足以實作者之言而山尊又雅好煥文煥且以聞之於山尊者復之織軒少好樸學無東南文士標榜之習乃試于有司輒不得志則廢寢食以工其藝以求當于時織軒非汲汲于仕進也曰吾親之志也庚子舉於鄉是年存南以獻賦受

主知賜官中書里人咸來賀汪氏織軒獨飲泣曰吾親日望吾之一遇而不及見也辛丑一赴公車其後輒中道已乃遂不赴而名益高生徒日盛有勸駕者曰吾親已矣吾無求焉織軒之篤於親可知已其處兄弟之閒推肥受瘠篤手足之愛有古人所難者授其子一經猶子亦各授一經先後皆有名庠序閒與

人交無急言遠色有以非禮加者受之無忤容獨有凌其兄者則奮身率其子急其難故其邑長鄉先生莫不交口相譽以爲篤行君子其爲文好余鄉五家而尤嗜桐城二方先生之作下筆汪洋曠遠不屑屑于揣摩故遇較晚而道益尊生平無聲色狗馬之好獨愛青鳥家言年六十登山不持杖昌黎所謂德之腴道之健是也有才子食餼矣旣冠而天有童鳥不與元之嘆其季有文能傳其學諸孫皆嶄然見頭角然則天之所以厚德人而昌其文者固斯在矣織軒高文樸行與其邑侯吾鄉袁鯉泉大尹有國士之知其舉於鄉實出吾鄉戴可亭侍御門下而煥又與其門下士交最熟宜乎山尊遍識海內能文之士不他之求而獨以侑爵之詩屬之僕也

江玉華七十壽序

往者嘉慶丁巳戊午肅依南城曾先生居揚州其都轉署中題襟館之賓客生徒皆識之始與吾友江成叔觀察定交成叔弱齒練事寡言慎交爲詩多雅音肅嘗爲同舍道之而邗上老友碩彥之與成叔習者則尤稱其內行醇備又十二年肅以養歸復僑居於揚三年與成叔讌遊最熟春秋佳日過之時宿康山別舍習其出入奉母夫人孝且謹又知其事兄玉華盡愛盡禮一日謂成叔曰肅交滿天下所識多至行之士然明發之懷夫人有之若子旣出嗣而骨肉之愛不衰於同生方離居而看雲對雨之思不減于中歲子誠古人哉成叔瞿然對曰某何足道某之兄古人也某幼孤露侍所生考與所嗣考日淺倚母氏之

養與教而吾兄寔提攜之誘掖之俾無隕先緒以成母氏之慈  
某以先業不能不居揚而吾兄中年以後愛故鄉嘗自遠于黃  
山雲海之閒某自疚不能盡弱弟之養報吾兄之德于十一子  
何譬之過也熏旣欽成叔之旣其實而辭其名而因以知玉華  
之能友江氏之門範必有所受之也一日熏獨遊平山中道憩  
桃花庵見壁上五言冲和淡遠是元結篋中集高響諦眎署款  
知爲玉華漫興之篇益信篤于性情者能爲雅音熏與成叔先  
詳其言而徐知其行與玉華則先習其行而後見其言而情與  
文相生之理皆可互證昔成叔所嗣考崔亭先生以名諸生爲  
直指所倚重總理江淮隴務者數十年後受

純廟特達之知授爲方伯而延接單門寒賸如恐不及又急三



黨之急故家仍貧其所生考橙里先生淡泊寡營獨攻詩古文  
詞同時名輩如金壽門蔣清容兩先生暨吾鄉金棕亭國博吾  
家杉亭司馬相與倡和執牛耳詩壇亦數十年肅昔得見於國  
博寓齋白鬚紅頰服飾古質而飄逸有神仙氣肅以爲老儒者  
不知其家貴盛歷一時也今以玉華兄弟之文與行上溯源流  
肅所謂有所受之者不益確乎肅嘗謂成叔曰肅屢屬張老檀  
鈕非石邀令兄爲西園之集而鴻翩鳳翔不可得近子能爲我  
請于長者乎成叔曰吾兄爲山中人矣明年壬申七十誕辰吾  
兄不來揚拜吾母某又不得歸里中拜吾兄則吾兄弟皆缺然  
悚然用敢於今年請吾兄來揚州筮日預爲壽則某兄得先洗  
觴壽吾母某從其後亦得潔一尊以祝吾兄而各盡其忱子盍

於是日爲坐上賓乎且云子之坐師儀徵阮君吾嫻也前年晤於都中將以文爲某兄壽余又戲謂成叔曰是近舍皇甫而遠求白傅也某不敢以詩干長者辱臨而自謂知情文相生之旨知玉華兄弟文行之深無所讓于吾師則坐上之知言者與玉華兄弟或不拒齋之一言以爲康爵侑且

今天子登海內于仁壽諭旨下大小吏皆以正人心厚風俗爲本舍是骨肉之間性情之際又何以副盛化而永聞家之遺澤耶繹成叔預爲元壽之言肅然藹然可以知其家崇禮而敦仁蓋窄亭橙里兩先生之貽有穀在是玉華之所以淑其弟而使之恭者在是經曰仁者壽又曰其子弟從之則孝弟忠信玉華生

聖人之世賁德邱園所以壽其身以壽其門範圍有量哉江氏  
世受國恩所以爲宗儔戚里式而上答

列聖之教育寵光又圖有量哉爾旣長言之質言之以獻于玉  
華更將質之吾師當亦謂小子善言德行且能詰壽之理也

何梧軒年文暨配李宜人七十雙壽序

漢韋平專門之學衍及孫支唐房杜代興之材光於世系伊古  
清第實產國華暨今大宗爭傳家範隆材起矣隱德先之粵東  
何氏在趙宋政和中有起家鼎元致身台輔者鴻白之聲流光  
庭樹丹黃之籍傳學楹書閱十餘世爲明太宰文懿公丰稜嶽  
立機智川流綱紀八紘樞鈐七略管子之書經國范公之志球  
時宏議不磨全書未缺同年瑞堂儀部所受之尊甫梧軒年丈  
者是也儀部少習義方壯飢嘉穀匪勉仕學之暇綢繆家國之  
閑守硯摩挲敢廢上公之業循蘭迢遞不勝明發之懷竹訊平  
安天與幽人之歲月芝泥爛熳

帝酬長德之恩勤當同年拜慶之朝正新歲延釐之始過庭詩

禮久識淵源當戶煙霞倍頤山壽請因苔共敬祝松承竊謂荷  
德莫大於繼志累仁莫先於淑鄉此百善之權輿亦眾祥之輪  
轄惟公溯青箱於先澤開絳帳於後堂感邠原之廢書則痛深  
往事督孫宏之習業則語本前徽迨乎才子名成昌辰宦達泥  
金送喜腰玉推恩覽千佛名經拜五花官誥則曰可以慰吾親  
之志矣箕治業傳臯夔謨在敷陳顏柳之訓敦篤忠孝之猷道  
在敬君功歸念祖值大勳屢洽文囿武嬉小慙暗滋風疑鶴警  
萑苻多盜草木皆兵國人將避浮言里長竟無固志翁曰遷則  
本搖定則氣壯請分粟以飽枵腹聚櫟以齊眾心卒收守望之  
功兼掖流亡之困陰德無量前知有神若夫片言釋訟高論改  
紛斜行畏王公之知公論信季布之諾故人之子孤露扶將周

親之倫朔風慰藉泉在山而能潤黍回谷而知溫享大年備諸  
福宜也德配李宜人有王母知人之識有班姑作史之材絡月  
機支浣霜碓響辛勤十指甘美三餐慰衰姑於暮齡供嚴師於  
穀旦靡弗備焉而且養氣之言作鹿車之諍友擇交之教樹鸚  
谷之大防韋幔訓篤而科第聯霸陵隱偕而桑榆永樂閒儷德  
貽善同心鳩杖並卻於青春鶴侶相莊於大厦不益徵名臣休  
聲之遠故家餘慶之多乎瑞堂以曾子固之通經後叔孫通而  
議禮士林崇其博議中朝尙其端凝觀馬生之文爭知家法錄  
鄭公之後都豔門材而兩老人郵寄嘉謨緘申幼學述祖德以  
彰良矩陳史事以勵官方俾金礪益堅錦洗加豔足徵神明之  
不倦可知福祚之不衰矣竊喜耆德之健存祝春光之永護幅

巾他日蘇髯遲捧衽之期珠履盛年洪厓記拍肩之地淩虛仙  
集遙瞻東上之烏祝嘏文成且托南飛之鶴

南海葉花谿先生暨配顏夫人六十雙壽序

嶺嶠之奇東粵據其全勢川陸之富南海羅爲隩區重洋珍錯所必趨百國商賈所必匯舳艫之聲動地金銀之氣干霄不有清第雅才大年碩望功德壽世著述等身散億秭之財以益國家貽詩書之穀以培子孫名位尊而春秋方盛文福備而眷屬皆仙何以揚休德行之科增重山川之秀乎茲於花谿葉公徵之矣竊聞內行篤者休嘉集家範立者子弟才多直諒之交者其道亨爲中和之言者其體固竦得交於令子雲谷有年矣春明下直從掃徑之遊夜雨論心聞過庭之訓雲谷神鋒峻削智囊曲包列宿照於民曹尙書倚爲武庫而笙歌潔白轂拒朱丹與人有善下之容應官無躁進之色蓋自專門學授隔幔經傳



養成虛谷之懷進以廉隅之礪固有所受之也又且草心繾綣  
小別思歸蘭路瞻依吾行已決相公惜去良友留行雲谷曰吾  
親之事親也少牽車以竭養晚舞綵以承歡白頭之慕如初朱  
紱之榮不易愛桑榆之景歡聲集於膝前分棗栗之甘喜色動  
於堂上與吾母未嘗一日去大母左右也吾敢惜宦程一年之  
別遲歸途三日之行乎孝子子孝不其然與肅又嘗從靈化伊  
墨卿太守德清蔡升甫司業游皆今之君子公之執友也每數  
四海舊游輒首五羊耆德謂公門範嚴於顏柳闡行篤於閔曾  
婢僕雲從夫婦捧饌醢之養魚鹽海會孫曾佩淡泊之箴爲侍  
潘輿鹿車對挽偶開謝墅馬帳先垂尊經師以衍簪纓禮通士  
而品書畫堂前護健階下芝齊家園本近浮邱畎畝仍同冀缺

行高履吉善積門昌兩君口無秕言筆稱柱史曾式高陽之里  
將題高密之閭徵以雲谷之言益信昨者鶴通竹訊鳳寄桐音  
諄諄勸學之書娓娓教忠之訓述先公厚德以勵爲善道大母  
苦節以勛立身偶惜流光閒成韻語桃花柳絮放翁對酒之篇  
海月石華謝客游山之句元黃綺合宮徵鈞調謝翦紅刻翠之  
勞胚胎初古極儷白妃青之巧涵濡太和志淑者無急言語安  
者有遐福用知壺中日永案與眉齊腕下風生筆偕齒健況公  
道存軍國澤在黔黎水引海而不尸雲在山而能潤餉輸後藏  
成元戎七捷之功費竭渾河通天府九達之道喀爾喀軍需暨  
永定河工公前後捐貲累萬金宀可移恥自腴之計玉音疊賁  
嘉謀國之忠若夫槐蔭旣成蕭根先護故人無葛帔之子儉歲

無菜色之隣白傅之裘推則暖生黍谷魯君之舟贈則悲解蒿  
邱公所濟者不可數舉顏夫人實佐之至行如彼陰德若此膺  
純嘏享遐齡宜哉然公與夫人聞其子將稱六十觴貽書止之  
曰親在不稱老吾方侍吾母敢言壽乎雲谷不敢再請煎以通  
家猶子之行聞德門長人之善觀國華而稽世媿論地望而景  
大賢上承綸綍之褒崇下據縉紳之通論臺萊之祝入於雅鍾  
鼎之榮勒爲銘因同官之徵文佐才子之獻爵其語質其理周  
雲谷歸爲大母誦之肅知邱太夫人必貴其孫之友無諛詞喜  
其子與婦無遺行而先進一觴焉公與夫人或亦不以爲謬悠  
之言乎是日浴日亭晴種花田馥陸公堤之萬柳皆郁劉王塢  
之羣芳並開公與夫人侍白髮而尋春酌紅友而醉月吾之文

方張於七十二峯二十四泉之閒其亦將挹袂洪崖題襟仙島  
耶

潘雲浦年丈暨配黃夫人六十雙壽序

蓋聞喬松之植踰千歲而靈芝生太璞之完薦六宗而嘉穀蔭  
何則質堅者道壽理粹者慶餘也伊古大宗家學之傳舊史世  
官之系國華照乎移萼門業聳以蘭楣鳳于陽而羽毛成鶴在  
陰而笙簧協其閒必有幽遐高時之士恆德駐世之儒遠其迹  
於鴻飛厚其詒於燕翼方歌偕隱貞茲坦履之祥同授六官輔  
以經帷之教以獨行開文苑以逸民起卿門隆隆未央源源可  
溯豈不盛哉雲浦年丈鍾淑山川漱芬詩禮觸辰引領鳳毛齊  
二陸之名象甲羅胸牛耳執三吳之社而且道兼華實理貫質  
文蔓言削而訓成批行刪而德立三春溫煦鐘鏞調雅頌之音  
肆夏從容尺寸秉高曾之矩藝真豹隱道足頤年勵德雞鳴時

聞戒旦今黃夫人扶風之戒誦於未笄詠雪之篇後於課織鏡  
臺玉潔珩璜佐君子之貽蠶館芸香燈火勸佳兒之學樹桑成  
蓋科名之草並滋種諫滿階靈壽之柯自健且夫昌辰飲水原  
有巢由才子韜光但賡邁軸士各有志其風古矣然而君慕宣  
高婦同晷志夫芸妻杼前耕後鋤或駒谷偕棲喁于丹壑或鹿  
車共陟來往青山大都幽草生遐單門習苦巷無車轍家鮮笏  
床鶴在軒中定身榮而心憊松生石罅自歲老而枝卑固也若  
夫墮簾疊和家聲久附於莖咸樸斲相承世業將高於嵩華國  
人識三公之里門子聯千佛之名藥榜芝蘭再登上第鯉庭桃  
李且有孫枝而乃富貴花前一枝梅遠駕鸞隊裏千仞鴻冥如  
公復乎尚矣方其長鳴日下初軻圖南韓退之曰薦孟郊蘇東

坡愧失李薦別風淮雨四庫資校字之功金馬石渠九重虛代  
言之席公則謂歸岫之雲閒出山之草小槐忙旣倦桂隱方招  
潔潔初衣軒軒遐舉值令兄某某公慕早休之達成勇退之高  
聯牀踐聽雨之言其被慰看雲之憶巷通南北追歡則夜月隨  
肩社集春秋扶醉則斜陽捧杖疏影照黃昏之雪千尺同看短  
篷載縹緲之青三人恰受長君某一偕計吏便作山臣兄子某  
名次大魁官應列宿輒因愛日久其眠雲公聯一姓之鷗盟其  
百年之鴻案煙霞供養駐顏比於金丹泉石逍遙壽世貽之彩  
筆和汝樂饑之句嘉偶同心酬予報國之誠卿才有嗣我芝軒  
少司馬同年射萬言策應五色雲珊網收瀕海之才玉律授瀛  
洲之士黑頭經國

天子貴梅楫之爲青眼照人多士切斗山之戴奉過庭之訓冰  
玉自完聞卻賄之言苞苴不到國恩錫類卿雲輝處士之星人  
瑞延釐官米釀神仙之酒丹山萬里聞鳳翽而心怡白髮千尋  
卻鳩扶而神健某春秋上計賢能附賈董之科輦轂趨公經濟  
識兵農之長誼同猶子未隨公瑾登堂酒進宜春豔說伯瑜舞  
綵五月八月兩端午後先陳續命之絲百歲千歲此長庚內外  
共長人之德頤齡華屋唱海邊刻玉之籌誦德詞場讓膝下鏤  
金之筆試譜南飛之鶴遠煩東下之魚寄我蕪詞侑公康爵



馬母胡太宜人六十壽序

蓋聞貞玉之道固享以上尊節柏之年承蔭成喬木是以崇臺  
既樹國人信其清紗幔方張經生世其學良以冰雪厲德爭日  
月之光荼蓼鎮心毓芝蘭之氣伊古大家中落而特起才子早  
孤而有成賢母之心苦焉慈幃之業偉焉國恩以厚門基以崇  
豈偶然哉西曹竹亭馬君昭質璞完嘉儀金式詩頌噬魴篤其  
孩提之愛禮修執雉肅乎俎豆之容淑問平反在官徵其仁術  
古交持擇與人尚乎素心上自卿貳親則師友僉謂文行相符  
仕學攸裕必有自也久乃道其乾蔭早失節母是毗嗣響清風  
託根孤露腹笥奇字得於寒灰面牆明箴聞諸斷杆蓋其母宜  
人胡湘源之望族也扶風之誠誦於未笄指日之誓陳於初字

既嬪君子宜其家人蘭陔並循羹湯佐菽水之養護室旣隕涕  
泗成竹露之祥惟時尊甫靈芝先生方下董子之帷治鄭公之  
學璞因別而自珍珠暗投而眾惜宜人纒綵燈右擘絮霜前專  
恃鍼神用資筆聖丹黃朱墨與錦匹相暉纂組文章及賦心並  
麗旣而溫卿應舉羣推國士之才李賀修文遽賦玉樓之召小  
鸞未健旅雁不歸蓋先生卒於桂林之年竹亭才二齡耳賢人  
厄於在已健婦悲其不辰藐焉始孩危於伯咸之子抱以自慰  
小於叔夜之男宜人初聞斷琴之訊將殉此身徐念守硯之言  
且恤我後水漿少進機杼仍勤典衣治葬俾夫子歸魂故鄉築  
室擇鄰命遺孤奉教世父又其時本生舅朝旌孝子萬支公猶  
在堂也曾閱篤行宜享大年回憲安貧已及莫歲桑榆景晚蓬

蒿徑深易歎桂珠亟資帛肉宜人竭十指之敏易百味之甘三  
牲進而手馱七襄報而杖卻至行如是人子所難旣以婦代子  
乃以慈兼嚴發楹中昔藏之書道泉下久賚之志東廂之提不  
遑其日課秋樹之讀輒伴以夜紡上堂法言肅若顏柳之訓踐  
席豫教先於師友之規蓋至藍田之玉成器丹山之鳳爲儀芝  
蘭蔚乎國華棹楔榮於朝典新進陳苦節之貞通國知彤管之  
煒而宜人春秋六十矣竹亭蓼莪賦劬白華戒養貞固之行旣  
達於

睿聰觀省之請將成於吉旦某李韓共舉盧賈同師從公瑾登  
堂尙歧異日喜伯瑜舞彩足慰望雲取義於靜女之三章拜慶  
於夫人之八座共述駢言遙侑康爵

王母阮恭人六十壽序

公宮亞裸詩陳大國之風子舍三加班在夫人之首景典型於前輩兼瞻翟茀之儀問官禮於郎君並述紗帷之學北堂設帨今年先拜春暉南極懸弧是日剛連秋旦熟聞蘭潔請祝松承惟我春甫年丈之配阮恭人七錄文獻之家立說詳於內則九華帝釋之字降神著於女宗柔則維嘉匪由師保德音自淑實協珩璜用是大夫相攸必求佳媚術者卜宅知有貴甥時我年丈當數千舞勺之年千言立就賦星渡雲梯之句萬口爭傳水鏡既逢帛琮先覲于歸百兩逮事重闈三日羹湯佐曾參之酒肉四時魚筍陪東哲之饗飧爲姑養姑推愛及愛分柑讓棗曲全父子之心紉履縫裳善給小郎之欲時我年丈從嚴君於外

塾下帷攻苦不時歸也縵袍寒雨自尋衣上之鍼老屋斜陽屢  
望雲邊之舍然而晚萱繞徑憂竟長忘晨鳥去林哺能待反則  
恭人之能承歡於門內也既而年丈達珪璋於天府司福命於  
文昌三殿賁以絲綸八駟擁於郵驛春明質舍黃席先溫秋水  
乘槎潘輿並逐通家拜慶卿貳有小門生之稱別館問安起居  
上太夫人之頌惟是金蓮寵遇退直恆近宵分玉節賢勞歸省  
必於歲暮御園珥筆時吟陟帖之篇華陘衡文暫缺循陔之什  
寒爐暑扇漸迫高年佐餽煇湯專憑健婦而又燕台粵嶺寒溫  
則南北相懸蚤雨蠻煙山谷則陰晴易變衰齡裘葛詎易調停  
長路舟車頗難慰藉憶少日釣遊之所在暮景時縈嗟此鄉禾  
麥之異宜常餐屢廢時則恭人常侍安車也長安問寢每及鷄

鳴遠道將車親爲鳩杖擗攜自豫未及求衣枕簟如常不知行路揀食單以求食性何貴三牲進鄉味以慰鄉心請加一飯此又恭人之承歡於京邸與節署也迨我年丈陳情之歲實我蓮府同年通籍之初其時恭人尙留都門也種名家之玉樹探上苑之琪花文章燕許之行殿閣楊劉之選玉堂金馬趾接家尊黃卷青燈經傳母氏於是恭人復因子貴受史官之養矣旋以舅章之逝卽爲星露之趨及含斂而未能慘晨昏而永隔年丈旣淚生孝筍恭人亦哀動慈烏後先成禮大德具於是焉若夫兄公女弟邱嫂諸姑推有分多念離問疾九門遠於初日不廢贈遺八座崇於層雲能憐貧賤扶將名教有夫之婢得夫庇蔭羈孤無厭之士皆厭惟恭則壽俾熾而昌有大德者享大年非

此母不生此子我同年誦曹大家之史東觀蜚英習衛夫人之  
書西清簪管華齡釋褐萬里持衡桃李新陰竟作君家之故事  
春秋大比壘司王國之勞求柱下趨庭日邊捧袂恭人以六筭  
偕老之身見片玉一枝之貴再傳高弟問業筵前兩代門生陳  
詩床下願而樂之喜可知也前此十年實開五秩多士有爲侑  
觴之請者我年伯母據禮文親在不稱老之訓力卻之曰舅姑  
在爲我壽非禮也昔則方爲人子謙柔新婦之心茲則並祝長  
庚焜耀太君之誕某等上京聯譜曾奉周旋吉日徵詞猥承謙  
讓榜中伯仲同登公瑾之堂膝下神仙方舞伯瑜之服看高秋  
桂窟正飄香於五福筵前待來歲椿華再舉蓋於千春席上

吳母易太孺人八十壽序

代

文田已未舉禮部同歲生南海吳編修荷屋宦有冬心文含春  
氣誦顏柳之訓自遡清風擬潘陸之篇先陳芳澤苔岑不遠芸  
館較深其此居游詳其文行掃門互戒遂多聯句之章陟岵頻  
瞻兼念含飴之德略窺門法並習閨儀媿矣煒矣旣而文田再  
廣華陞親到仙鄉每於試事畢修年家拜慶之文觀長者娛親  
之舞知尊甫廣文君菑盤潔養五十而慕未衰蘭路承歡三公  
之榮不易語云孝子之子恆孝乃嘆荷屋悅心柱史砥志筮詩  
羣居忘寵辱之驚在遠篤恩勤之慕固有所受之也君又進文  
田告之曰先君子藏真嶺嶠樂素衡門早傳孟喜之經壯習桓  
寬之論車牛服賈稍酬負米之心卷軸隨身未廢決科之業又



以嫡母黃太孺人早卒凡門以內細則井臼盤飧鉅則冠婚喪祭皆生母易太孺人一身經理之蠶川星映桑滿筠籃機石霜明絲紫錦匹鹿麤魚膾神享而賓亦娛帛潔珩鏘冠成而采亦納明年春秋八十矣眎聽不衰婢奴仍課白頭卻杖自潔蘋蘩青眼篝燈尙同操作先君子無華膺之慕有圖古之思不棄糲袍頻揮珍饌太孺人衣甘大布飾卻黃金拔簪珥以賙三黨之貧薄滋味以厚四時之饗雖以孫榮光之仕幸邀芝檢遂御翟衣瞻銘鼎而循牆理練裙於浣渚而又慕丈夫之義戒婦人之仁貽嘉穀於孫枝示周行於子舍下帷講學擇經師尤貴人師斷杼砥愚爲慈母竟兼嚴父某平生不敢干進而勉其子不負君親之恩者太孺人之教也文田聞而再拜勒之五中屬瓜代

已逢萍開重聚言尋柏悅爲誦松承方將道兩代之康強慰五  
年之瞻望而荷屋命筵日下設悅城南憶弄孫梨棗之恩張拜  
母衣裳之會思侑芳辰之爵猥索小子之言文田謹以聞於尊  
甫者作駢言以述之語質而道存福齊而詞舉孳望雲之慕酬  
飲露之心荷屋書以魚箋繫諸鴿羽啟華堂之屏障佐初度之  
壺尊豈惟大母太孺人嘉其善言德行試盡一觴乎尊甫亦且  
喜其子之友無諛詞無妄語可以攻玉並爲加餐也

吳母章太安人六十壽序

鴻文萬選賦詩仰求士之心扈雨三篙洗甲應得賢之慶合天人而送喜漢倬雲祥兼家國而延禧芝榮葭健此我棣華同年爲其母章太安人稱六十觴所以極昌辰錫類之大觀快才子酬恩之奢願也且夫皇風翔洽垓埏多上壽之年門業崇隆閨閣有經生之學酈泉飲菊直擬餐霞謝幔編芸亦呼祭酒然而全天之木樂生足以延齡連理之枝和氣易於成蔭乃或產苓有穎雪已沍於寒巖芘穀多心塵早埋夫華玉斷琴音竭傳響良難古井波枯分甘何術門子之餐久曠恃桑箔以承歡先公之硯雖存憑菽灰而授學層冰一室茶蘖飶而松柏仍承孤露諸郎機杼成而圭璋竟達安節之功偉焉履豐之福隆焉方我

年丈騎箕之辰棣華才四歲耳清門蘭蕙乾蔭先摧陋巷簞瓢  
屯憂易聚屢支一木集蓼巢孤茅捲三重牽蘿袖薄楹書未發  
東廂淒栩栩棘之風陔草將馨北堂迫桑榆之日維其時大母春  
秋高矣長貧可樂薪米謀疏貞疾方占參苓價貴太安人一燈  
自督夜啟鍼樓十指恆皸冬臨浣渚繩牀絮暖憂縷不斷之機  
瓦案飴甘健婦親耕之粟眎寒暄之節捧杖加衣乞草木之靈  
拔釵貰藥風寒燈炮形影時依星曙雞鳴抑搔未倦晨昏有倚  
九京懋陟岵之心左右無方衰歲忘在牀之苦又且上堂侍膳  
設帳談經繡鳳於削竹之旁和熊於作羹之暇喜白髮呻吟之  
乍減便課書聲告青箱付託之有人略抒病悃六官家法戒兒  
讀非聖之書七學問基代父授可傳之業下帷相士特嚴春社

論交典劔供師不責夕葵負米破窗蟀靜淵淵作拊石之聲嘉  
樹鶯諧軋軋嗣紡車之響添五紋而日永奇字如山編三絕而  
芸香華文垂露階前瑜珥慧根依慈姥之筠樓角奎婁文曜照  
幽人之室接龍頭之軌名續王商通虎阜之靈神依申甫含霜  
負雪天憐廿六載之心拔幟簪花人冠三百名之榜我棣華同  
年厲學韋籟束身裴塾居則白華戒養出則青雲致身皆太安  
人之教也徙鵬兩海舒文則逐影蘇韓倚馬萬言射策則聯鑣  
賈董錦袍謝客山川會靈秀之胸白面王郎雲日絢詩書之色  
有文扛鼎兩元稱領袖之才命汝作霖七字錫公卿之福科追  
壬戌金宗伯則文武兼優家本勾吳彭司馬則祖孫相望承飲  
冰之訓定作完人發種玉之祥更貽令緒亦何憂古今人之不

相及哉又况聯行藥榜仲子已並羽秋雯染袂芹香文孫且振  
聲初朝福來未艾儀庚慰擇里之勤壽誦無疆周甲值掄元之  
歲捧

天章而迓吉堪侑手仇開畫錦以承歡欣逢頤解

戴師母楊安人五十壽序

蓋聞列鼎華腴之族內行克完式車廉謹之風閨儀亦淑是以王珪既貴家事咨邱嫂而行仇覽早孤時名賴慈言而立絳紗未撤三公稱官禮之師赤管既書四國奉居游之宇況乎都中弟子親傳隔幔之經門下生徒兼聽升堂之講望宮墻而志喜才子承家瞻翟茀而陳詩良辰御福桃蹊陰在是先公舊樹之材菊徑香餘爲仙母新稱之爵請歌悅潔用侑觥馨惟我戴師母楊安人關西華系江右名宗澄粹蘊于性成圖懿隆于教篤蘭揚玉穎蔚爲女宗棗費金行嬪于君子凡夫蘭膳佐南陔之養蘋羞薦北牖之馨珩璜豫贈遺之資錦繡具衣裳之用詳矣備矣惟是閔閔旣崇淡泊罕明于中饋起居早貴謙抑鮮中于

上儀舉校必恭匪所論于命婦辟纏同苦詎可責諸卿門而我  
師門業峻于崔張詞術高于揚馬素志炯于參憲澹懷躋于荀  
陳雖復椿蔭崢嶸棗枝蔥蔚芝階接葉于鳳渚竹林駢筍于鸞  
坡九重之知魏乎早達四牡之命榮于遘征而退食蕭閒寡營  
寡嗜羣居困淡不忤不求取與嚴一介之閑昭冥懷四知之訓  
寶筵大布未異單寒鈴閣清齋兼通禪悅內廷侍講不言溫室  
之枝使院掄文自貯冰壺之玉肅肅乎履霜葆素超超乎飲露  
含清安人辛苦同行幽閑中度屏珍膳華衣之進習縫紉浣濯  
之勞鳳詔旣頌國恩自厚鶴糧時匱家風本清釵常質之賈  
人有核自陳于客次我師固忘其貧也駢駱再光于原陞轡軒  
更莅于漢湖節署晨局內外之言無出入鍼樓夜課婢御以下



均逸勞用能藎米捩擋克遂大廉之志權衡專一不分慎選之  
思暨乎歲在龍蛇人騎箕尾文星隕于芷澤素旒淒于松風華  
桐一枝生猶未健做書三篋貧竟如斯長路舟輕空甌米罄而  
安人謂飲泉如昨矩矱可憑貽穀旣祥門閭益大種松盈抱辛  
勤成卜壤之功茹蓼腴神慷慨卻指囷之贈囊金自乏楹書固  
存謂良箕不僅在科名謂遺穀莫先于廉讓教成蘇頌報食盧  
綸長君崑禾弱冠通經盛年砥行賦白華之養克副門基讀青  
箱之遺倍完昭質夫固有所受矣今我師之弟方官大司馬賓  
佐樞庭兼掌京尹魏公之澤爲霖鄭君之門如水崑禾侍顏京  
邸從學都門屏絕外交率由內訓公卿接踵豈待卜哉值梅嶺  
迎春護庭介壽馬宅之笙歌不設萊衣之安吉足娛某幸出韓

門遂踐孔席憶坐風于昔德美愛日子孝思有同聲烏且以已  
未舉禮部者出儀徵阮公門公亦丙午門下士是年覆試則又  
大司馬承

旨所錄取也推一脈受恩之誼拜兩朝取士之恩既悉門基兼  
聞闡行德人益算方如東上之曦小子獻言願奏南飛之鶴

盛母張太宜人六十壽序

蓋聞不易之葉瑞蔭乎靈芝特達之珪章含於貞璞自古衰宗  
基固清第穀豐霜已壓而春回雨將摧而厦立必有閩中士行  
閩內師資百折踰而氣毓昆吾一絲續而采彰黼黻國人知其  
苦節造物優以大年俾懷清之臺永式乎京邑投經之幔兼迨  
乎曾來德斯立焉報亦偉矣惟我盛母張太宜人含醇初地鍾  
粹名宗兩京漢詞二銘宋學家傳彩筆世飲清名太宜人匱圓  
鏡之澄光習方矩之懿度扶風之誠已古誦於未笄指日之誓  
如新陳於初字其歸我贈公也金釵撒於繩樞盡篋搜於蓬戶  
高軒入座督電嫻以留賓弱綫添紋邀鍼神以成匹短牆色辨  
已過蠶川寒水波凝仍臨浣渚季女豆籩之薦君子珩璜之貽

皆大婦之令儀猶淑人之恆軌惟是贈公以詞人之胄生讓王之鄉吳下袁曇早張赤幟燕南孫嶽立致青雲而乃貫甲才多在辰命舛甫廣桃實已歎桐枯蓋贈公赴召巫陽時太宜人年才二十有五也且夫疾風勁草貞婦比於蓋臣孤露寒灰哲士成於寡母守范家之硯終授奇兒斷孟母之機竟綿絕學古有之矣然果珠真入手蘭早生階北陸提攜東廂慰藉可以卜廬陵之有後信京兆之代興則雖小於叔夜之男弱於仲昕之女典衣翦髮拭目名成擇友延師愜心緒衍哀琴自罷待筓簪六籍之才獨爾仍纒倚潤色九章之傑神駒旣育雛鳳將鳴天資彤管之輝太卜單門之蔚而太宜人有難焉者已悲寡鵠並少童烏空谷牽蘿但有侍兒補屋寒窗拈綫惟憑鄰女分燈賦心

幼而好音誰懷抱手澤而遺書奚付蓋太宜人守志後踰年而  
某始生又數年而始入繼也太宜人喜中郎之有姪慰伯道之  
無兒貞柏露甘寄生亦茂冽泉珠沸旁出皆澄發此楹書授之  
椽筆踐席豫教先於師傅之規上堂勛勞肅若顏柳之訓蓋至  
藍田之玉成瑚璉丹山之鳥爲羽儀杞梓挺乎門材式昭訓迪  
棹楔榮於朝典略慰恩勤而太宜人春秋六十矣口竹律六箏  
桐花萬里砥行合五君之粹舒文擷七略之精春谷蜚聲秋官  
典要平反屢問仁術延禧勞逸親論慈言懸的屬蒲觴將進端  
午陳續命之絲蘭路方循由庚補潔華之什春暉自永憶沐葉  
於卅年古井無波與江河而萬古伯瑜舞綵詩以懷恩公瑾登  
堂禮隆拜慶某論交輦轂共膝下之苔岑獻頌臺萊進杯中之

柏葉敬陳燕製用佐華筵

孫善慶校字  
外孫薛葆捷